



# ACCENTS

radio

televisiun

multimedia

nr. 3  
settember 2016  
annada 7

Tips dal primemprendist

pagina 6

«... e co è stà tes emprim di tar RTR?»

paginas 8-9

«Far musica è 'medischina' per la vita»

paginas 10-11

Mr. helpdesk junior

pagina 24

## «... raquintar las istorgias da nossa regiun»

«No Billag», discussiuns davart il service public e la SRG SSR. Tematicas che han fatschentà Ladina Heimgartner, directura RTR, ils ultims mais en moda e maniera intensiva. Tuttina ha ella prendì temp per dar pled e fatg a l'antierur emprendist commerzial, Orlando Cadonau.

### Cura preschenta RTR il format «Der Bachelor» per rumantsch?

(Ri) Jau hai già guardà «Der Bachelor» sin divers emetturs e chat quai relativamain divertent. Dentant na correspunda quest format betg als standards da RTR.

d'avair ina chasa da medias absolut independenta d'influenzas politicas ed economicas e che serva als umans en Svizra. Quai è stada l'idea primara dal service public, e questa idea è anc oz actuala.

### L'ultim temp è vegni discutà fitg savenz davart il service public en las medias. Tge è atgnamain l'idea che stat davos quest chavazzin?

Service public è ina fitg buna idea che festivescha bainprest 100 onns. E quest service public ha in'ingredienza speziala. Numnadamain

### Adempsicha RTR quest service public?

Gea, en mintga cas. RTR vegn finanzià per gronda part cun entradas dal maun public, uschia che nus tutgain e servin als umans en Svizra. Entras quai essan nus independents e n'ans laschain betg cumprar u influenzar.



La directura RTR Ladina Heimgartner en discussiun cun l'antierur emprendist RTR Orlando Cadonau.

### È l'emissiun Palaver da RTR era service public?

Il Palaver reflectescha tge ch'è capità durant l'emna, dat ina vista fitg cumpacta sin ils temas e tracta quels

ord differentas opticas. E tut quai gida da forsa survegnir ina nova perspectiva d'in tema, ina ch'ins n'aveva forsa anc betg considerà.

(cunt. pag. 2)



### Editorial

Novas ideas ed outras modas da pensar

Suenter las vacanzas da stad cu menza savens er il temp da grondas midadas per personas giuvnas. Tgi cuntaschesha la scolaziun sco studenta u student, tgi fa in emprendissadi e tgi fa ses emprims pass en la vita profesionala sco persuna diplomada.

Ed era RTR porscha onn per onn pliras pussaivladads da scolaziun per giuvenils e giuvens crescids. Quai en furma dad emprendissadi da commerzi e d'informatica ubain praticums e stages en las redacziuns da radio, televisiun e multimedia. Collavuraturas giuvens e collavuraturas giuvens han ina fitg gronda impurtanza per RTR. Per l'ina essan nus la suelta chasa da medias che porscha ina scolaziun schurnalistica rumantscha e per l'autra vegn nossa

interpresa uschia adina puspè refrestgentada cun novas ideas ed outras modas da pensar.

Era questa ediziun dals ACCENTS è insatge «nov», ella vegn numdamain or da la plima d'in team giuvenischem. La redacziun principala è stada en ils mauns da nossas emprendistas e da noss emprendists. La schefredactura Hanna Last, emprendista commerziala en il terz onn d'emprendissadi, e ses team che consista dad Orlando Cadonau, Vanessa

Erni, Selina Huonder e Fabio Pally, han investì blera lavur e creativitat en questa gasetta ed jau chat ch'ellas ed els pon esser sa-tisfatgs dal resultat.

Andrina Luzio,  
assistenta da la direcziun  
e furmatura professiunala

E co plaschan ils ACCENTS a Vus?  
Resuns, laud, critica ed inputs ad  
accents@rtr.ch

# «... raquintar las istorgias da nossa regiun»

(cunt. da pag. 1)

## ***Il service public n'exista giuridicamente betg. Tgi definescha lura quel?***

Mintgin ch'ins dumonda ha in'atgna definiziun dal service public. Quai che nus duvrain sco orientaziun è quai ch'il Cussegl federal define-scha.

## ***Essan nus damai ina chasa da medias dal stadi?***

Nus essan ina chasa da medias independenta, nus essan ina societad. Natiralmain survegnin nus daners dal maun public, e perquai èsi correct che la politica ed il stadi defineschan las reglas da gieu. Dentant, en il rom da quellas reglas avain nus autonomia totala. Quai stat er uschia in la Constituziun. En Svizra èn las medias uschè independentas dal stadi sco en strusch in auter pa-jais.

## ***Jau legess gugent avant in citat da la cussegliera naziunala da la PPS Natalie Rickli: «Entwicklung und die vielen neuen Angebote (...) muss man viel mehr würdigen. Der Service public ist heute nicht mehr das Gleiche wie früher (...) Deshalb können wir das staatliche Angebot und die Gebühren reduzieren.» Ditg curta-main, co vesess ina SRG SSR ora cun entradas da 600 milliuns enstagl da 1,2 milliardas ad onn?***

Tenor mai è quai in sbagli da ponderaziun. Natalie Rickli di che nus

avain oz uschè bler ch'ina purschida publica na saja betg necessaria. Ed jau crai che nus avain oz uschè bler ch'igl è precis ussa necessari d'avair ina chasa da medias che fa urden. Umans tschertgan orientaziun, e nus essan la chasa da medias che dat orientaziun. E quai cun novitads retschertgadas e funtaunas seriusas. Per quest motiv na sun jau insumma betg da l'avis da Natalie Rickli.

La SRG SSR è preschenta en tut las quatter regiuns linguisticas da la Svizra. Quest federalissem ha ses pretsch. Ina SRG SSR cun la mesada da las entradas munta tranter auter ina centralisaziun, probablamain a Turitg. Vul dir, era RTR stuess transferir parts da sia produzioni, ma era diversas pazzas da lavour a Turitg.

## ***La quantitat da la purschida da la SRG SSR dat era da discurrer. Èn 17 emetturs da radio propri necessaris?***

Ins sto savair che questi 17 emetturs èn emetturs da quatter regiuns linguisticas. Sch'ins guarda sin ina singula regiun, ves'ins che quai è ina purschida fitg raschunaivila. Jau crai ch'il martgà en Svizra è grond avunda per nus, sco era per ils privats. La SRG SSR porscha p.ex. quatter emetturs che sa concentreschan mo sin cultura. E quai èn purschidas ch'ins na vegniss mai da finanziar senza il maun public e che privats na porschan era betg.

## ***Tge capita, sche l'iniziativa «No Billag» vegn acceptada?***

Sche «No Billag» vegn acceptà, tirain nus il «Stecker».

## ***Vala quai era per RTR?***

Gea, quai è la fin da la SRG SSR e da RTR. Vul dir, nagina Tagesschau, negin Echo der Zeit, negin Teleguard.

## ***Ils iniziants da «No Billag» èn principalmain politichers giuvens. Na cuntanscha la SRG SSR cun lur purschida betg la giumentegna?***

La SRG cuntanscha schon ils giuvens, dentant pudessan nus es-ser megliers en quai. Quai è probablamain la pli gronda sfida che nus avain en l'avegnir. Chattar ina furma da communicaziun che corrispunda als interess dals giuvens. Nus na savain betg pli far mo tge ch'è bun tenor noss pensar. Quai temp è passà. Nus stuain vegnir fitg svelt en in dialog cun ils giuvens per pudair enconuscher ed ademplir meglier lur basegns.

## ***Pon las purschidas da la SRG SSR anc tegnair pitg al tempo da l'internet?***

Igl è in fatg che nus n'essan betg mo gronds, mabain era fitg federalistics. Nus avain dentant era decidi che nus n'essan betg quels che curran sco emprims tras il mir e suon-dan mintga trend. Nus observain ils trends e reagin, sche necessari. Quai avain nus p.ex. fatg en connex cun la nova tecnologia UHD (Ultra High Definition Television, in format digital da televisiun cun in meglier maletg che HD). En il comité directiv da la SRG SSR avain nus discussiunà, ed alura decidi da realisar in test cun il championadi europeic da ballape.

## ***Pertge è la SRG SSR insumma sut in tal squitsch politic?***

Quai ha da far cun in fenomen dal

temp dad oz. Igl è daventà modern d'esser cunter instituziuns tradiziunals. Quai vala p.ex. per il Cussegl federal, la Posta, las Viafiers federa-las svizras ed era la SRG SSR. Da l'autra vart ston ins era differenziar danunder ch'il squitsch vegn. Èsi propi il public u èsi la politica? E tge politichers èn quai. Igl è ina Natalie

## ***«Sche «No Billag» vegn acceptà, tirain nus il «Stecker.»***

Rickli, in Christoph Blocher ed in Roger Köppel. E casualmain èn tutti traiss colliads professionalmain en ina moda u l'autra cun las medias.

## ***Dapi la primavaira collavura la SRG SSR cun la Swisscom e Ringier. Pertge?***

I dat il trend da «Targeted Advertising», pia reclama personalizada. Per propi pudair profitar da quest martgà dovra la SRG SSR partena-rist. E qua pon Ringier e la Swisscom contribuir. Uschia avain nus fundà «Admeira», in'interpresa che po tegnair pitg a la concurrenzia da l'exteriur, p.ex. RTL, SAT 1, ma era Facebook u Google che fan già daditg reclama en Svizra. La lavour schurnalistica n'è absolutamain betg pertutgada da questa nova interresa ch'è dal reminent averta e porscha servetschs a tut quels che han interess.

## ***N'è questa collavuraziun betg capi-tada il fauss mument?***

Questa collavuraziun è insatge nov e grond, ed i dat anc inqual segn da dumonda co che quai vegn a vesair ore tge influenza che quai vegn ad avair sin il martgà da reclama en Svizra. Uschia èn quai reacziuns normalas sin ina tala collavuraziun.

## ***15% da las entradas da la SRG SSR derivan da la reclama. Per vegnir en-***



## cunter als privats pudess ins desister da questa funtauna.

Sche nus desistin da las entradas da reclama – en cifras fissan quai ca. 300 milliuns francs – stuess RTR p.ex. spargnar sis milliuns francs. Concret vuless quai dir che nus stuessan relaschar 1/3 da noss personal, quai vul dir ca. 50 personas. Ultra da quai avess il public naturalmain pli pauc program, stuess dentant tuttina pajar ina taxa da concessiun da CHF 400.– ad onn.

## In'ulteriura abreviaziun ch'ins auda en connex cun RTR è SRG.R. Tge è la SRG.R?

La SRG.R è la societad pertadra da RTR. Quai èn bun 1'000 commembra e commembers che representant il interess da RTR. La SRG.R s'engascha er en il rom da discussiuns politicas sco en connex cun «No Billag». Da l'autra vart han las commembra e ils commembers er in tschert pled en chapitel. Numnadaman en il cussegli dal pu-

«(...) per lantschar in process è la quota perquai in instrument raschunaivel.»

blic. Là pon els p.ex. giuditgar la qualitat da noss programs. Sco commember da la SRG.R sustegn ins nossa chasa da medias rumantscha.

## Es ti cumenta cun l'egalitat tranterum e dunna tar la SRG SSR e RTR?

Quai che reguarda las pajas schon. Là avain nus buns resultats. Nus avain ina pitschna discrepanza che na salacha betg declarar. Dentant essan nus sin fitg buna via. Quai che pertutga las funcziuns da manar na sun jau insumma betg cumenta. Propri betg! Ni tar la SRG SSR ni tar RTR. Nus avain in grond dischequilibre quai che pertutga las funcziuns da manar ed il cader. Jau sun la suletta dunna en il comité directiv da la SRG SSR e da RTR. Sin ils differents stgalims da manar da RTR giavischass jau anc dapli dunnas qualifitgadas (perquai che be esser dunna na basta

naturalmain era betg). Ma quellas dunnas dessi! Insumma duvrain nus ultra da quai er in bun equiliber trantler las vegliadetgras e culturas – nua èn p.ex. tut ils giuvens e las giuvnas da las famiglias portugaisas en il Grischun? Gugent avessan nus dapli persunas cun ragischs da migrazion che avessan interess da lavourar tar

«Nus essan ina chasa da medias independenta.»

RTR. Nus duvrain ina pli gronda diversitat che resplenda uschia era la realitat en noss pajais.

## Dovra la SRG SSR perquai ina quota?

La SRG SSR ha en mintga cas la finamira d'augmentar il dumber da dunnas en posiziuns da cader. Atgnamain sun jau dentant encunter quotas. Tge dunna vuless schon esser «dunna da quota»? Da l'auter maun sforz'ins la glieud d'instradar mesuras e da realisar fitg svelt emprims pass. Per lantschar in process è la quota perquai in instrument raschunaivel.

## Tge midadas immediatas

### faschessas Ti?

Tar la SRG SSR midass jau la salata da bustabs en ils logos, cun SRG SSR, SRF, SRG.R e.u.v. Quests blers bustabs chaschunan adina confusio. Tar RTR rinforzass jau immediat ils cuntegns da program per uffants pitschens (video) e per giuvens creschids (audio, video e web).

## Co vesan la SRG SSR ed RTR or en 20 onns?

En 20 onns poss jau imaginar che la SRG SSR ed RTR vegnan a vesair ora tut auter. Fitg bler vegn ad esser digital. Jau crai che RTR è lura anc adina fermamain represchentà en las regiuns. Esser tar la glieud e riquintar las istorgias da nostra regiun n'è betg insatge ch'ins po remplazar cun in computer. Là avain nus ina plivalur per noss cuntegns e per nossa «community rumantscha».

## Giubileums da fatschenta

### settember 2016

Giacun Caduff – 30 onns  
René Spescha – 30 onns

Riccarda Müller – 5 onns

Cordiala gratulaziun e grazia fitg per la lavur e la fidaivladad.

### november 2016

Alois Beer – 15 onns  
Petra Rothmund – 15 onns  
Guadench Dazzi – 10 onns  
Adrian Camartin – 10 onns  
Roman Schmid – 10 onns  
Uorschla Campell – 5 onns

**Partenza**  
**fin d'avust 2016**  
Heidi Sutter-Martinelli  
**fin da november 2016**  
Roland Cajacob

## Play RTR cun novas funcziuns

Play RTR lubescha in spert access a cuntegns d'audio e da video da RTR. Il servetsch è accessibel via la pagina d'internet rtr.ch u sco app per telefonins (IOs ed Android).

(uc) La purschida vegn optimada cuntinuadament, uschia ch'i dat era novas funcziuns.



Tadlar radio live fin sis uras pli tard (timeshift)

Avais Vus manchentà insatge al radio? Nagin problem a partir dad oz. Sper il tadlar radio live datti uss era la pussaivladad da tadlar las emisiuns fin sis uras pli tard. La funcziun è actualmain accessibla en las apps sut l'opziun «Tadlar Radio». Uschia pudais Vus tadlar l'emissiun «Tge chaussas» era durant la pauza da mezdi u las «Gratulaziuns» la saira suenter la lavur.

## Tschertga

Avais Vus forsa già tschertgà contribuziuns davart Vossa vischnanca u Vossa uniun? La tschertga è vegnida surlavurada, uschia ch'igl è pussaivel da tschertgar spert contribuziuns d'audio e da video tenor giavisch.

## Google Chromecast (Android)

La tecnologia lubescha da consumar cuntegns da telefonin (Android) a la televisiun. Per far diever

Cun Play RTR: Tadlar Radio  
Rumantsch fin sis uras pli tard.

da quest servetsch è necessari in adapter per la televisiun.

## Giavischs per adattaziuns?

En las apps e sin la pagina d'internet avais Vus la pussaivladad dad As participar a noss questiunari. Gidai nus da megliar ossa purschida tenor Voss giavischs.

# Tgi vegn – tgi mida – tgi sa scolescha



**Donatella Bonifazi** (\*1993) fa dapi mez avust 2016 in praticum en la redacziun dal Telesguard. Ella è creschida si a Lai ed a Cuira e discura surmiran. Ella ha fatg il ginnasi a la Scola chantunala grischuna a Cuira ed il bachelor en scienzas da publicistica e comunicaziun a l'Universitat da Turitg. Dapi il 2010 fa ella lavurs auxiliares a l'institut dal Dicziunari Rumantsch Grischun.



**Selina Chistell** (\*1992) turna per dus mais tar ils reporters dal Radio Rumantsch e quai da la fin d'avust enfin la fin d'october 2016.



**Flurin Clalüna** (\*1998) fa dapi mez avust 2016 in praticum tar ils reporters dal Radio Rumantsch. El è da Sent ed ha fatg questa stad la matura a la Scola media evangelica da Schiers.



**Maurus Candrian** (\*1987) retorna per sis mais davent da l'entschatta da settember 2016 enfin la fin da favrer 2017 tar ils reporters dal Radio Rumantsch.



**Nina Defuns** (\*1996) fa dapi mez avust 2016 in praticum en la redacziun dal Telesguard. Ella vegn da Trun ed ha fatg la stad 2015 la matura a la Scola claustral da Mustér. Durant l'onn intermediar ha ella fatg viadis en l'Europa dal l'Ost ed en

l'Asia e suenter ha ella fatg in praticum tar l'ANR.



**Emilia Maria Gomes da Costa Barros** (\*1977) cumenza il settember 2016 sco nettegiunza da la cafetaria da la chasa RTR. Ella deriva dal Portugal ed abitescha a Cuira.



**Silvan Maissen** (\*1992) fa dapi l'avust 2016 fin il schaner 2017 in praticum da sis mais tar Battaporta/MSG. El vegn da Trun, ha fatg la Scola media commerziala a Glion e la maturitat professiunala. Sia experientscha professiunala ha el rimà sco emploïa commerzial tar il Spital regiunal a Glion, tar Josias Gasser Baumaterialien e tar l'interresa Tarcisi Maissen SA.



**Gion Hosang** (\*1979) è dapi l'avust 2016 era redactur dal Telesguard, ses lieu da la vur resta a Mustér ed el resta era vinavant correspondent da radio.



**Gion Dominic Pohle** (\*1991) ha suenter in praticum da sis mais en la redacziun da musica cumenzà l'avust 2016 sco redactur da musica.



**Giuachin Tuor** (\*1989) ha survegnì il diplom «tecniciSSS informatica» da l'ibW a Cuira.

Cordiala gratulaziun e bun'entschatta.

## Tge generaziun es ti?

Tge pensa tia generaziun da la laver, da la famiglia, dad amis, da l'amur, da sex e da la politica? Tar il project «Generation What?» vai per dumondas en connex cun las chaussas impurtantas da la vita.

(bb) Patratgan las Svedaisas auter dals fugitivs, èn ils Franzos pli liberales en dumondas da la sexualitat, teman ils pajais da l'ost il svilup economic, e tge manegian las Svizras ed ils Svizzers insumma da l'Europa sco instituziun? Quai èn dumondas ch'ins po responder tar il project da web «Generation What?». La finalmira da quest project internaziunal è da chattar ora co che la generaziun giuvna patratga, viva e senta, e sch'i dat differenzas tranter las singulas naziuns, en il nord u en il sid, en il vest u en l'ost. L'Uniun europeica da radio e televisiun (UER/EBU) ha lantschà quest project en

numeris pajais da l'Europa ed en collavuraziun cun differentas stazioni da radio e televisiun publicas. En Svizra fan sper RTR era part noss collegas da RSI ed RTS. L'idea è da motivar tantas personas sco pussaivel da participar al questiunari da var 150 dumondas che pertutgan ils pli differents aspects da la vita privata, politica ed economica da mintgina e mintgin da nus.

**Passa 800'000 participantas e participants**

Naturalment na dat il questiunari betg in purtret representativ da l'Europa e da la Svizra. El mussa



Er en chasa RTR vegn respondi a las dumondas da «Generation What?».

dentant co che quels che sa participesch an al questiunari patratgan en connex cun differentes temes. Ed ins vesa era, sch'i dat differenzas tranter dunnas ed umens, giuvan e vegl, tranter personas che han studiati e personas che han emprendi in masterg. Fin ussa han passa 800'000 personas respondi a las

dumondas. RTR vegn a tematisar adina puspli dumondas dal questiunari en ses programs, saja quai tar Battaporta u er en las emissiuns da radio e televisiun.

Las contribuziuns ed il questiunari chattan ins sin : generation-what.ch/rm ubain rtr.ch.

# 10 onns chasa da medias RTR – 10 onns «Sonda lunga»

Ils 12 da novembre ha lieu a Cuira la 10avla ediziun da l'occurrenza culturala «Sonda lunga». Quest onn sa preschenta era RTR. Quai cun in program cultural e culinari per pitschen e grond.

(ea) La «Sonda lunga» è sa sviluppa-  
da ils ultims onns a la pli gronda occurrenza da cultura da la chapitala grischuna. Durant 12 uras vegn offrì al public in program fitg multifar cun concerts, prelecziuns, exposizioni, producziuns da teater ed anc bler dapi. E quest onn na po betg mo la «Sonda lunga» festivar in pitschen giubileum. Avant 10 onns ha RTR fatg midada en sia nova chasa da medias, e questa chaschun vulain nus nizzegiar per far a noss public in pitschen regal d'anniver-  
sari. Ils 12 da novembre pudais Vus emprender d'enconuscher en detagi l'offerta da RTR, tadlar istorginas raquintadas da Tonia Maria Zindel, sentir l'atmosfera da Nadal cun il chant dals Furbaz e laschar pupragnar culinaricamain dal team dad Amarenda.

## Program RTR

Avant chasa RTR spetga la «Micro-lotta» – in bus da VW da l'annada 1978 – sin Vus. Il bus è equipà cun in'infrastructura d'audio, da video e da multimedia e porscha la pussaivladad da guardar e tadlar nossa vasta offerta da program.

## Istorginas

Da las 14:00 fin las 18:00, adina da l'ura entira, pon uffants – ma era creschids – sa laschar manar en il mund magic da las paraulas. Tonia Maria Zindel raquinta istorginas legras e captivantas. Il studio da televisiun da RTR sa transfurma per ina giada en ina cuntrada plain misteris e surpraisas. E sco pitschna regurdiantscha survegnan ils uffants lura er ina registraziun da video da lur visita tar RTR.

## Furbaz

Durant il temp d'avvent e da Nadal emplainan els dapi onns las salas da concert en l'entira Svizra. En l'audiatori da la Banca Chantunala Grischuna a Cuira preschenta RTR la gruppa da chant rumantscha la pli famusa. A las 17:00 ed a las 18:00 chantan els exclusivamain per las visitadoras ed ils visitaders da la «Sonda lunga» chanzuns dal nov program cun il qual els van lura a partir dal decembre sin turnea.

## Bun appetit

Sa chapescha che nus procurain era per Voss bainstar corporal. Il team dad Amarenda da Surrein envida avant chasa RTR a maluns, capuns ed autres spezialitads indigenas.

## Sonda lunga en Chasa Rumantscha

Ed era la Lia Rumantscha (LR) enviada cun in program multifar a la «Sonda lunga». Durant il suenter-



RTR envida al concert cun ils Furbaz Giusep Quinter, Marie Louise Werth, Gion Andrea Casanova ed Ursin Defuns.

mezdi avra Leza Dosch las portas da la Chasa Rumantscha e raquinta da sia architectura ed istoria. Il public giuven emprenda d'enconuscher ils Babulins, ils protagonists dal program da famiglia Kidsfits: l'actura Anna Mengardi raquinta e gioga istorias dals fragliuns Luisa e Nic, dal giat Brutus e dal chaun Lupo. Vers saira preschenta Pia Valär sias illustraziuns ch'ella ha fatg a Beirut. Pia Valär è stada l'em prima residenta en l'atelier d'art a Beirut purschi da la LR e da l'ambas-

sada Svizra en il Libanon. La saira avra «L'ustaria dad Anny» sias portas ad in'operetta per in'ustiera e dus chantadurs e mez. Quai èn Chasper Curò Mani, Daniel Bentz ed Anny Weiler. Els vegnan accumpagnads dal pianist Risch Biert. Per finir chanta Anny Weiler jazz rumantsch. Per il bainstar culinari procuran Guido e Corina Sgier da l'Hotel Postigliun ad Andiast.

Dapli infurmaziuns sin la pagina [langersamstag.ch](http://langersamstag.ch)

**RTR E LA CHATSCHA**

**03-09 FIN 10-09**  
**E 19-09 FIN 29-09-2016**  
**SALIDS DA CHATSCHA**  
**MINTGA SAIRA, 21:00-22:00**

**VOSSA PREDA**  
 Tramettai ina fotografia  
 da Vossa pred a [multimedia@rtr.ch](mailto:multimedia@rtr.ch)  
 e participai a la concurrenza.

**RTR** Radiotelevisiun  
 Svizra Rumantscha

SRG SSR

al puls dal Grischun

# «Adina star vi da la balla»

Ils 2 d'avust da quest onn ha Vanessa Erni da Trin cumenzà ses emprendissadi da commerzi tar RTR. Ella è sa legrada fitg sin quel di, era sch'ella è stada in pau gnervusa il cumenzament. Intginas emnas pli tard è Vanessa s'inscuntrada cun l'antierur primemprendist Orlando Cadonau da Vuorz per in barat.

**Vanessa:** Sco scolara sunjau gia stada pliras giadas cun il pass da vacanzas e la classa a far guids en chasa RTR. Quai m'ha plaschì fitg bain. Cura che jau hai vis che RTR tschertga in'emprendista commerziala èsi stà cler che jau m'annunziel ed jau sun cuntenta che jau hai survegnì la plazza. Jau ma legrel fitg sin queste traïs onns. E ti Orlando, faschessas ti anc ina giada des emprendissadi tar RTR?

**Orlando:** Gea, jau giess anc ina giada la medema via. Per mai è l'emprendissadi da commerzi ina buna basa per il futur. Tar RTR hai jau vulì ir, perquai ch'il mund da medias ha già adina sveglià mes interess ed jau vuleva far l'emprendissadi en in'instituzion rumantscha.

**Vanessa:** Jau hai ussa d'emprender bleras novas chaussas. Cunzunt da tegnair endament tut ils numbs da las novas collegas e dals novs collegas da lavur e lura anc da parter tiers ils numbs a la dretga fatscha fa fadia. Datti in tric? E tge spetga mai uschiglio anc quels traïs onns?

**Orlando:** Tai spetgan lavurs fitg variadas en differentas partiziuns administrativas. Ti vegns a survegnir dapertut ina buna invista. Areguard numbs e fatschas sun jau ma senti exact tuttina sco ti. Jau crai che quai è normal. La lavur al retschaviment è in grond agid. Ins vegn en contact cun l'entira chassa e suenter curt temp enconusch'ins quasi mintgin. Auters tips che jau poss dar a tai: far notizias e sche ti na chapeschas betg insatge, dumonda

suenter, betg sajas memia schenada. Cun ils divers idioms na chapeesch'ins betg adina tut. Ed i na dat naginas tuppas dumondas!

**Vanessa:** Grazia per quels tips! Ti has ditg ch'ins lavura sco emprendista en differentas partiziuns. Tge lavurs has ti fatg il pli gugent en quels traïs onns? Tge è stà plitost stentus e tge è stà il pli pretensius?

**Orlando:** Il pli gugent: pausa da café (ri). Nanana! Jau na poss betg dir tge che jau hai fatg il pli gugent. L'emprim onn han ins sco emprendist quasi la responsabladad exclusiva per il material da biro. Là hai jau sentì ina gronda fidanza e quai ha fatg grond tschaffen. L'invista en il mund da finanzas e contracts da la-

| Num  | Orlando Dea Cadonau | Vanessa Erni              |
|--|---------------------|---------------------------|
| <b>Annada</b>  | 1997                | 2000                      |
| <b>Dimora</b>  | Vuorz               | Trin                      |
| <b>Rom preferì en scola</b>                              | istorgia            | rumantsch                 |
| <b>Hobis</b>   | ballape             | ir a chaval e fitness     |
| <b>Giavisch da professiun<br/>sco scolaret/scolareta</b> | parasgulader        | chantadura<br>e coiffeusa |

vur ch'ins survegn en il segund onn è era stà interessant. Il terz onn hai jau dastgà tgirar nossa pagina d'internet, p.ex. cun chargiar si texts, audios e videos. Era quai m'ha plaschì fitg bain. Il bel è ch'ins ha blera variaziun. Il pli stentus: far il chartun! E pretensius è cunzunt stà il segund onn en scola, lura hai jau già ina pitschna crisa. En scola vala: adina star vi da la balla.

**Vanessa:** «Adina star vi da la balla» – ina metafra dal sport, tge auter?! Ti es gea fan da ballape e giogas era sez. Ha tes hobi gidà en biro?

**Orlando:** Entras il ballape sun jau già stà disà da lavurar en in team e

d'esser flexibel. Duas qualitads che jau poss en mintga cas era duvrar en la lavur.

**Vanessa:** Per finir anc in sguard enavant. Mes siemi suenter quels traïs onns è da far ina scolazion per davantar moderatura da televisiun. E co vai ussa vinavant tar tai?

**Orlando:** L'emprim cloma la scola da recruts ad Airolo. Suenter questas 18 emnas vacanzas verdas turn jau già puspè tar RTR. Lura sco praticant tar Battaporta, nossa redacziun da giuvenils. Fin alura has ti seguir già «sut controlla» la chasa.



Orlando Cadonau dat tips per l'emprendissadi a Vanessa Erni.

# En memoria

## Eligi Derungs (\*1960 – †2016)

(rtr) Ils 18 da fanadur è mort a Cuira en la vegliadetgna da 56 onns l'autur da films Eligi Derungs – quai suenter curta e greva malsogna. Ses davos film documentar aveva Eligi Derungs realisà questa primavaira, in film documentar davart l'ospital en Val Müstair.

Eligi Derungs, oriund da Vella, ha lavurà ils ultims 16 onns sco redactur da televisiun tar RTR: passa 12 onns per il Telesguard, ils davos onns per l'emissiun da Cuntrasts. Durant quel temp ha el realisà numeros films documentars – per il solit films cun in flair per in mintgadi svanaivel en las vals grischunas.

**In flair per il mund passager**  
Uschia ha Eligi Derungs tranter auuter documentà ils paucs abitants da Mulegns («Mulegns – cò nign tgi ferma») ed el ha accompagnà durant in onn l'ir e vegnir a Vanesch entadim la Val Lumnezia («Vanescha pli gitg ch'ins stat e pli gitg ch'ins stess»). Però dasperas al stevan a cor era films naschids or da l'actuallat, uschia ha el p.ex. realisà la fin

dal 2015 dus films documentars davart il center per requirents d'asil Rustico a Laax («Ils novs vischins da Laax»). Ils films dad Eligi Derungs han adina demussà la gronda empatia ch'el aveva – malgrà la camera – per sias protagonistas e ses protagonists.

**Engaschament per il teater**  
Gia da pitschen ensi ha Eligi Derungs gì ina gronda passiun era per il teater. Cun set onns è el stà l'emprima giada sin tribuna. Silsuenter è el s'engaschè sin divers palcs dal teater laic, e quai en numerosas funcziuns: sco actur, autur, reschissur e suprastant en l'Uniun grischuna per il teater popular ed en l'Uniun centrala da teater popular svizzer. Durant diesch onns ha Eligi Derungs era furmà ensemble cun Linus Livers il duo cabaretistic «Paun cun pèra». Il 1997 è el vegnì undrà per ses engaschament sin il champ dal teater laic cun in premi da promozion dal chantun Grischun.



# Cun RTR a l'ILHGA 2016 a Glion

Dals 13 fin ils 16 d'october 2016 sa preschenta RTR cun la Microlotta ed in Artg musical a l'ILHGA 2016 a Glion.

(dj) En il center stattan il barat ed il dialog cun il public. Visitadoras e visitadars pon participar activamain al program, dar in resun, prender part a la concurrenza ed emprender d'enconuscher las collavuraturas ed ils collavuraturs da RTR.

La Microlotta è equipada cun infrastructura d'audio, da video e da

multimedia. Sin in dals visurs pon ins obsevar la moderatura en il studio dal Radio Rumantsch, dar

ina baterlada ubain pazzar in giavisch musical. Lura stattan er a disposiziun differents visurs per fu-

fragnar en las emissiuns da Battaporta, dal Minisguard, dals Cuntrasts e dal Telesguard. Plinavant pon ils visitadars e las visitadoras navigar en l'app Play RTR ubain tramerter fotografias, impressiuns e commentaris via Facebook e Twitter direct al lieu. Nati ralmain ch'il classicher n'astga betg mancar – il gieu dal marenghin. Tgi che respunda correctamain a tuttas pretensiuns, gudogna in marenghin.



Era la Microlotta da RTR, in bus da 38 onns, è preschenta a l'ILHGA 2016.

Dapli infurmaziuns suondan pli tard sin rtr.ch.

# «... e co è stà tes emprim di da lavour?»

Selina Huonder e Vanessa Erni, emprendistas RTR, han fatg quella dumonda ad intginas collavuraturas ed intgins collavuratus da RTR.

Tar l'introducziun èsi stà bel da survegnir in'invista en las partizius ch'ins na vesa uschiglio betg. RTR è fitg famigliar ed jau sun ma sentida fitg bain. Cun bleras infurmaziuns e stancia sun jau ida a chasa l'emprima saira.



**Lea Livers**  
redactura newsdesk  
emprim di tar RTR: 01-08-2016

Cura che jau hai cumenzà avant 19 onns, hai jau udi en la cafetaria ch'ina persuna sursilvana discurriva cun insatgi da l'Engiadina. Quel mument sun jau stà fitg surstà che quellas duas personas chapivan ina l'autra. Tge ch'è era restà bain en memoria è la maschina da scriver sin mes pult.



**Claudio De Pedrini**  
producent Telesguard  
emprim di tar RTR: 01-04-1997

L'emprim di da lavour è stà per mai fitg intensiv e planisà tras. Il di è stà plain impressiuns, infurmaziuns, nova glieud e la saira era jau stancia morta.



**Fabia Caduff**  
stagiaire, reportra da radio e multimedia  
emprim di tar RTR: 01-08-2014

La damaun, cura che jau sun vegni al retschaviment da RTR, è era gist Mariano Tschuer, da lez temp directur, vegni a la lavour. L'antierur directur ha beneventà mai ed immediat fatg amogna il «ti». Quai ha fatg gronda impressiun a mai,



**Gian-Marc Maissen**  
reporter / moderatur Radio Rumantsch  
emprim di tar RTR: 01-08-2013

Ils emprims dis hai jau vesì fitg bleras fatschas novas ed udi fitg blers numbs novs. Jau hai adina puspè ma dumandà «Tgi è tgi? E nua chat jau quella persuna?». L'entschatta sun jau adina puspè «ida a perder» en chasa. Ma suenter intginas emnas hai jau lura gi la survista.



**Riccarda Müller**  
producenta Radio Rumantsch  
emprim di tar RTR: 01-11-2011

L'emprim di da lavur ha ḡ lieu ina sesida da redacziun da televisiun. Cura ch'ils collegas da l'Engiadina Bassa han discurrì, n'hai jau betg propi chapì tut. Cun dumandar suenter èsi adina vegnì meglier. Jau hai ḡ in fitg bun emprim di.

**Daniel Berther**um da camera e montader da video  
emprim di tar RTR: 01-06-1999

Pervia d'ina malchapientscha era jau in'ura memia baud davant la chasa RTR. Cura che Sergio Guetg ha ḡ pausa da moderar è el i ord chasa e m'ha avert la porta cun ses badge, per che jau possia spetgar dadens. Il di m'ha plaschi fitg bain ed jau hai emprendì fitg bler.

**Prisca Bundi**reportra Radio Rumantsch  
emprim di tar RTR: 01-08-2010

Jau hai cumenzà tar RTR l'ema che nossà chasa da medias è vegnida inaugurada. Per mai è l'emprim di da lavur stà ina fitg bella e buna experientscha.

**Enver Krasniqi**montader da video  
emprim di tar RTR: 01-06-2006

Jau hai ma legrà fitg, ed era in pau cun battacor, sin l'emprim di da lavur. Tut insatge nov per mai è stà che las collavuraturas ed ils collavuratur dal program han plazs da lavur nunpersonals e che mintgin ha in caddy (stgaffa cun truclets sin rodas, per dustar il material da biro). Ussa che jau sun ma disada londervi, na vuless jau nagin auter sistem pli.

Perquai che jau hai ḡ ina greva operaziun vi dal chalun e stuì ir cun crutschas, è il cumenzament tar RTR stà fitg strapatschant. Tuttina è l'emprim di restà en buna memoria, las persunas simpaticas ed avertas han bunamain stgatschà las dolurs.

**Gian Claudio Caprez**responsabel stab program  
emprim di tar RTR: 01-07-2015**Ladina Schena**moderatura accumpagnament  
emprim di tar RTR: 01-09-2015

# Moviments ritmics che fan impressiun

Andrin Kienz (26) è commember da la Musica Ramosch, da la Brass Band Sursilvana (BBS), da la Wallberg Band ed el è era d'udir en differentas autres furmaziuns e projects.

(hl) L'idea da vulair far musica ha el già entras concerts da la societat da musica e la musica giuvenila da Ramosch, duas societads da gronda tradiziun e valita per il vitg. Per el

giuvenils e suenter en la «musica gronda». Gia en l'emprima classa ha el cumenzà ad emprender da sunar l'orgelet da maun. Suenter in onn ha el però midà sin battaria, ses instrument preferì. Ses magister da musica ha persvas il giuven musicist da sunar sper la battaria anc auters instruments or da la famiglia da percussiun (xilofon, marimba, vibrafon, timpani, euv.). Oz è Andrin fitg cuntent che ses scolast ha dà uschè blera paisa a quai. Cuntzunt il marimba tutga oz tar in da ses instruments preferids.

## «Far musica è 'medischina' per la vita»

Andrin Kienz, tecnicist da tun, e Gion Gieri Flepp (pag. 11), stagiariaire (reporter da radio e multimedia) – dus giuvens che han la medema passiun: la musica. Hanna Last è s'inscuntrada cun ils dus musicists per vegnir a savair dapli da lur hobi.

saja quai gia d'uffant stà fascinant da tadlar ed era d'observar ils musicants durant ils concerts – cuntzunt ils battarists e percussiunists cun lur moviments ritmics al han fatg impressiun da l'entschatta davent. Per il giuven che deriva d'ina famiglia musicala èsi adina stà cler ch'el veglia sunar in di en la musica da

## Musica è ina part da sia lavur

La dumonda da far or da ses hobi ina professiun è stada ditg in grond tema per il giuven da Ramosch. Ch'el è sa decidì encunter quai ha differents motivs. Fin ussa n'è el betg s'enrichà da sia decisiun. «Cun meis manster sco tecnicist da tun n'ha eu chattà üna lavur chi cumbina meis hobi e mia fascinaziun per tecnica e ch'im plascha fich bain.» La musica è ina part da sia lavur ed i saja da grond



Andrin Kienz cun ses marimba.

avantatg d'avair sez ina colliaziun cun la musica e d'enconuscher ils differents stils da musica ed er ils instruments. Il musicist collia cun ses hobi fitg blers bels muments. En buna memoria è restà ad el p.ex. in concert cun in orchester da giuvenils en la «Tonhalle» a Turitg. Però era da sunar cun la Wallberg Band en il KKL a Lucerna ubain cun la BBS a Montreux èn per el mintg'onn evenimenti nun emblidaivels. Ses giavisch è da pas-

sentar anc blers bels muments cun ses collegas da la musica e da promover la musica e la cultura da musica en nossa regiun. Tenor Andrin è la musica fitg impurtanta per nossa societad ed era per il svilup e la furmaziun d'in uman. Ad in giuven u ina giuvna che vuless emprender da sunar in instrument dat el il suandard tip: «Cumanzar subit!» ed el agiunta «Eu sun persvas, cha far musica es 'medicina' per la vita.»

# Sunar fin e melodius, ma era far canera

Gion Gieri Flepp (25) ha già adina già gugent la musica e per el eri già en scola primara cler che sias uras da flauta sajan l'emprim pass per pudair sunar suenter in auter instrument.

(hl) Oz suna il giuven da Mustér differents instruments. Ses emprim instrument da brass era il cornet. Il corn en es è ses instrument ferm en la Societat da musica Rabius/Surrein, «fetg bi per sunar parts melodiusas». E la posaua, che plaschia ad el fitg bain, è ses instrument en la musica da

tschaiver «Las Fifferlottas» da Segnas. Cun ella sappian ins sunar fin e melodius, ma era far canera. Sper ses instruments principals ha el era emprendi da sunar in zic keyboard, che n'ha dentant mai fascinà el uschè ferm sco la musica da brass. Ed in zic ghitarra acustica ch'el ha emprendì durant il studi

da scolast a la Scola auta da pedagogia e che saja stà fitg bun per accompagnar ils uffants en las lecziuns da chant. Durant il temp da preparaziun per in concert, exercitescha Gion Gieri tranter diesch minutus ed in'ura per di, tut tenor grad da difficultad dals tocs. Vitiers vegnan las provas comunablas, per regla duas sairas per emna. Da far musica sco profesion na po el betg s'imaginar. «Da vegnir pagaus per far musica bein, denton buc da viver dalla musica.

Per gliez sundel jeu buc buns avunda.» Perencunter, da diriger ina furmaziun sper la lavur, pudess el atgnamain s'imaginar, deplorabla main manca ad el però actualmain il temp. «Jeu hai denton era già astgau far empremas experientschas cun star davontier e direger.» Ed emprims curs da diriger haja el era già frequentà.

## Il bel vegn suenter

Il pli bel mument cun far musica (cont. pag. 11)

## Sunar fin e melodius, ma era far canera

(cunt. da pag. 10)

saja stà da sunar plirs bellischems tocs, in da quels era p.ex. Grand Valley Fanfare da Eric Ewazen, a las nozzas d'in collega – era gia las preparativas cun l'ensemble sajan stadas nunemblaivlas. Tge che plascha era fitg bain al giuven è da sunar a chaschun da festas da musica, suenter in lung ed intensiv temp da preparaziun. Il gavisch da Gion Gieri è da pudair far

enavant buna musica en buna cumpagnia. A giuvens e giuvnas che vulessan emprender in instrument ubain far part d'ina societad da musica cussegla el da prender l'entschatta uras da musica enfin ch'ins è pront per far part ad ina musica giuvenila ubain ad ina societad da musica. «Quei cul trenar ei cunzun l'entschatta buc adina mo bi, denton ei vala la peina da tener la dira, il bi vegn suenter.»

## Fiutscher 2016

Dals 9 fin ils 13 da novembre ha lieu la quarta ediziun da l'exposiziun professiunala grischuna per scolaziuns e furmaziuns FIUTSCHER. Era questa giada è RTR da la partida e preschenta las differentas professiuns che vegnan pratitgadas en la chasa da medias.

(hl) La finamira principala da l'exposiziun è da far attents cunzunt giuvenils e giuvens crescids a la vasta tscherna d'emprendissadis, scolaziuns e furmaziuns. Era RTR è pus-pè da la partida cun in stan – quest onn cun ina purschida interactiva. Las visitadoras ed ils visitaders vegnan ad avair la pussaivladad dad esser per in mument part d'ina redacziun schurnalistica e da producir sezs videos. Tge che spetga las interessadas ed ils interessads en detagl na vulain nus betg tradir or davant. Visitai nus durant l'exposiziun ed As laschai manar en il mund da medias. Ultra da quai infurmeschan collavuraturas e collavurturs da RTR davart las differentas pussaivladads d'emprendissadis e stages, las differentas professiuns sco er il lavuratori «far medias» che ha lieu duas giadas ad onn en chasa RTR. Vossa visita en la Halla da la citad da Cuira faschess plaschair.



Gion Gieri Flepp cun ses corn en es.



## La concurrenza

**Co han num las emprendistas actualas ed ils emprendists actuals da RTR?**

- Dominik Hardegger, Selina Huonder, Orlando Cadonau, Fabio Pally
- Vanessa Erni, Selina Huonder, Hanna Last, Fabio Pally
- Vanessa Erni, Tanja Derungs, Hanna Last, Marina Morgenthaler


**Premis:**

2 taxas da partenza per il Transviamala  
transviamala.ch

**Tramettai la resposta fin ils 28 da settember 2016 ad:**

accents@rtr.ch ubain a  
RTR Radiotelevisiun Svizra Rumantscha  
Accents  
Via da Masans 2  
7002 Cuira

**La victura da la davosa concurrenza:**  
Nadja Pelican, Domat



LAVURATORI FAR MEDIAS

SONDA, ILS 19-11-2016, 08:30 - 17:30

Dapli sin [www.rtr.ch/plazzas](http://www.rtr.ch/plazzas) al puls dal Grischun

## RTR sin via tar Vus

Occurrentzas cun participaziun da RTR.

Qua chattais Vus ina survista dals events, nua che RTR è da la partida.

Visitai noss stan, dai ina baterlada e participai a nossa concurrenza.

**10 - 11-09-2016 a Jenins:**  
festa da vin

**17-09-2016 a Mels/Sargans:**  
avant il Pizolpark

**13 - 16-10-2016 a Glion:**  
exposiziun da mastergn e commerzi ILHGA

**19-10-2016 a Cuira:**  
premiera da film: medis da chasa

**27-10-2016 a Mustér:**  
discussiun da podium davart il Parc Adula

**28-10-2016 a Cuira:**  
5 onns City West

**9 - 13-11-2016 a Cuira:**  
exposiziun da professiuns Fiutscher

**12-11-2016 a Cuira:**  
Sonda lunga

NOV: Tadlar  
Radio Rumantsch live



[www.rtr.ch/play](http://www.rtr.ch/play)

### Carmen Wetzel

**27 onns, Mustér, assistenta en la partizun infra-structuras da la vischnanca dad Ilanz/Glion**

«Mintgatant ina lumparia, mintgatant in event, in'emissiun e magari ina sgnocca. Il contact uman ha embelli mias emnas tar RTR. Ils onns én sgulads. Per mai in temp nunemblidaivel che resta en buna memoria. Massa bellas e legras uras, engraziel!»

### Flurina Huonder

**27 onns, Cuira/Segnas, documentalista tar RTR**

«Ils emprims dis d'emprendissadi tar RTR, cura che jau na chapiva anc betg tut ils idioms, devi schon inqualina legra discussiun pervia da mal-chapientschas.»



### Andrina Luzio

**26 onns, Cuira/Savognin, assistenta da la direcziun RTR**

«Tar RTR dastg jau dapi 10 onns rimnar bellas experientschas, far amicizias ed adina puspè emprender insatge nov.»



### Silvia Calzaferri

**26 onns, Andiast/Breil, referendaria tar l'Institut d'assicuranza sociala dal chantun Grischun**

«Che jau hai già la pussaivladad da lavurar ord chasa durant events e vegnir uschia en contact cun il public ha plaschi a mai fitg bain. In'autra bella regurdientscha è d'avair pudi gidar a preparar acziuns spezialas sco p.ex. il chalender da Nadal dal Radio Rumantsch.»



### Romina Dietrich

**25 onns, London GB/Andiast, responsabla per il design e las translaziuns da l'emballadi tar LIDL UK ed artista da make-up SFX independenta**

«Mai hai adina interessà en spezial tge che capita davos las culissas d'ina chasa da medias. Igl è stà in emprendissadi spezial, jau hai emprendi ina massa tar RTR e fatg amicizias che tegnan anc oz.»



Tge fan atgnamain ...

... nossas anteriuuras emprendistas e noss anteriurs emprendists?  
Etge regurdanzas han ellas ed els da lur temp d'emprendissadi?

**Giuachin Tuor**  
27 onns, Cuira/Trun, informaticher RTR

«La prontadad da gidar e la collegialitat entaifer il team da la partizun tecnica hai jau stimà fitg durant l'emprendissadi e quai fatsch jau er anc oz. Plinavant m'ha plaschi bain che jau hai gi la pussaivladad da vesair ils differents champs da la tecnica durant mes emprendissadi.»

**Marina Morgenthaler**  
23 onns, Farschno/Mustér, referendaria sponsoring ed events RTR

«Durant l'emprendissadi hai jau adina ditg: suenter l'emprendissadi vom jau puspè a Mustér, Cuira n'è nagut per mai. Ed ussa, quatter onns pli tard? Da chasa ma sent jau a Farschno, la lavur tar RTR ma plascha anc adina fitg bain ed jau sun anc adina persvasa che restar tar RTR è stà ina buna decisiun.»

**Dominik Hardegger**  
23 onns, Cuira, redactur Battaporta/Minisguard/online tar RTR

«Forsa na saveva jau betg propri tge emprendissadi far ... en mintga cas ha RTR fatg or da mai in redactur en pliras redacziuns e quai plascha a mai. Hai forsa num in di 'anteriur emprendist daventa directur'?»

**Tanja Derungs**  
20 onns, Cuira/Castrisch, assistenta stab program RTR

«RTR è in lieu da lavur fitg variant cun blera glieud da tut las regiuns rumantschas. I gira bler ed jau n'hai mai lungurus!»

**Daria Flury**  
19 onns, Cuira/Breil, praticanta tar la Banca Chantunala Grischuna

«Dapli ch'in onn è ussa passà dapi la fin da mes emprendissadi tar RTR. Jau aveva decidi da far l'emprendissadi tar RTR, perquai che la lingua ed er il mund da medias han adina fascinà mai.»

## Impressum

**editura:** Radiotelevisiun Svizra  
Rumantscha, 7002 Cuira

**gremi editorial:** Ladina Heimgartner (lh), Erwin Ardüser (ea), Johann Clopath (jc), Tamara Deflorin (td)

**gremi redaciunal:** Orlando Cadonau (oc), Vanessa Erni, Selina Huonder, Hanna Last (hl), Andrina Luzio (al), Fabio Pally

**per questa ediziun han era**

**collavrù:** Elin Batista, Bernard Bearth (bb), Esther Bigiel (eb), Umberto Camathias (uc), Orlando Cadonau (oc), Livio Chistell, Vanessa Erni, Corsin Gadola (cg), Dominik Hardegger, Flurina Huonder, Selina Huonder, Diana Jörg (dj), Hanna Last (hl), Ursin Lechmann, Andrina Luzio (al), Mirco Manetsch, Marina Morgenthaler (mm), Fabio Pally, Gion Dominic Pohle, Anna Maria Ratti (amr), Daniela Toupane, Flavio Tuor, Daniel Wasescha

**grafica e cumposiziun:** Johann Clopath

**correctorat:** Lia Rumantscha

**stampa:** Somedia Production,  
Cuira

**datas da publicaziun:** 4 giadas  
l'onn (1-3 / 1-6 / 1-9 / 1-12)

**ediziun:** 3'300 exemplars

**contact:** accents@rtr.ch,  
Radiotelevisiun Svizra  
Rumantscha,  
Via da Masans 2, 7002 Cuira  
tel. 081 255 75 75

Gugent resguardain nus Voss  
giavischs per ulteriurs abuna-  
ments, midadas d'adressa, euv.

**era sin:** rtr.ch/accents

**ClimatePartner**  
neutral al clima

Stampa || ID 53466-1601-1010

# ... manchentà mo per pauc il gol

Ils 11 da fanadur è ina squadra da RTR suandada l'invit al turnier da ballape da la SRG SSR a Turitg.

(oc) Il chapitani, trenader, manager e schef da sport da l'equipa RTR, Gian Reto Derungs, è sa decidi suenter ina planisaziun minuziosa per nov collavuraturs da diversas partiziuns da la chasa.

Il viadi ha cumenzà glindesdi suentermezdi. Cun sulettamain in trenament communabel en las chommas – per inqual in trenament da memia – essan nus partids vers Turitg. L'equipa era rinforzada cun inqual «alt stars» dal ballape regiunal. Alois Beer, Patrick Alig e Gian Reto Derungs èn nums enconuschents per las ureglas d'experts dal ballape sur-silvan. Arrivads a Turitg hai già num sa stgamiar e sa stgaudar. L'emprim contact cun la balla n'ha betg laschà sperar sin ina presentaziun al turnier gloriusa.

## Paradas miraculusas

Andrin Kienz, tecnicist da tun RTR, ha sajettà la balla cun eleganza sur la saiv da la piazza da ballape. In ferm sfratg ha laschà savair nus che la balla è sa platgada sin in auto. Er il segund tecnicist da tun, Goni Alig (num da cumbat: «Die Lunge»), n'ha betg procurà per novitads legraivlas. Durant sa stgaudar ha el sentì ina leva dolur en la coissa (pli probabel anc in relict dal trenament da l'enna passada). Suenter duas cigaretas ed in tir sin il gol n'è la dolur betg svanida. Anzi, ella è veginida pli ferma. Durant l'emprim gieu




La squadra da RTR davos da sanester: Alois Beer, Corsin Gadola, Andrin Kienz, Orlando Cadonau e Gian Carlo Candinas. Davant da sanester: Gian-Marc Maissen, Gian Reto Derungs, Patrick Alig e Goni Alig.

encunter «Loggomotive Leutschenbach» ha Corsin Gadola parà miraculusamain, ed uschia tegnì nus en il gieu. Deplorablamain hai dà en la davosa minuta il 1:0 per l'equipa da Turitg. Questa terrada ha dentant dasdà nossa ambizion. Uschia che nus avain suenter ina midada dal sistem, numnadaman d'in 2 2 1 sin in 2 1 2, gudagnà il segund gieu cun 1:0. Suenter ina terrada nunneccessaria hai dà en il quart gieu ina clera vitoria da 4:0 cunter l'equipa dal «Schweiz aktuell».

## Engaschament total

Quest gieu ha perfin pudì muventar il spussà Goni Alig per in curt comeback sin la piazza. Tar l'equipa da SRF han ins sentì che la cumponenta grischuna, en la persuna d'Otmar Seiler, ha mancà al gieu. Ils adversaris da noss davos gieu èn stads ils emprendists dal TPC. Igl è stà in gieu fitg dir ed intensiv cun in resultat final da 1:1. En quest davos gieu essan nus tuts creschids sur nus ora. Las davosas minutias dal gieu è «Die Lunge», malgrà dolurs, sa decidi per in'acziun da cumbat, ed avess uschia bunamain procurà per la sensaziun dal turnier. El ha sajettà in mirveglius «volley» che ha manchentà mo per pauc il gol. Ed ils auters? Gian Reto Derungs ha briglià cun quai che vegn mess en tgina a mintga Lumnezian, numnadaman cun «tacklings» dirs dentant fairs e Gian Carlo Candinas cun paradas à la Oliver Kahn durant ses megliers temps. Per trais puncts hai la finala betg tanschì da sa qua-

lifitgar per ils quartfinals. Dentant è quai stà ina prestaziun nunspetgada e fitg ferma da l'equipa RTR. Perquai ha il telefonin d'inqual giugadur lura era vesì ora l'auter di uschia:



## Vocabulari da ballapedists:

- Alt stars -> anteriurs giugaders da num e pum
- Volley -> tir directamain or da l'aria
- Tackling -> sbrajattada
- Oliver Kahn -> anterius goli da l'equipa naziunala tudestga
- Ancillo Canepa -> president dal club da ballape da Turitg
- Vladimir Petkovic -> trenader da l'equipa naziunala svizra
- José Mourinho -> trenader da Manchester United

# En tschintg dis da patria a patria

Gian-Marco Maissen, reporter RR, ha duas patrias: Puntraschigna e Surrein. Da glindesdi il 1. fin venderdi ils 5 d'avust ha el vuli emprender d'encouscher la glieud tranter ils dus vitgs e quai cun chaminar 140 kilometers a pe da l'Engiadina fin en Surselva.

(rtr) Il prim d'avust, la damaun a las 07:00, cumenza il reporter Gian-Marco Maissen ses viadi. El è creschi si a Puntraschigna ed è er i là a scola. Sias ragischs èn dentant a Sur-

rein. Ses geniturs derivan numnadamain omadus da la Cadi en Surselva. Il viadi da Puntraschigna a Surrein ha el gia fatg bleras giadas, p.ex. cun auto u cun tren. Ma a pe anc mai. Per ses viadi n'ha el betg organisà plazzas da durmir. Perquai ha el dumandà las audituras ed ils auditurs dal Radio Rumantsch dar ad el suttetg.

## Gronda motivaziun

Ses viadi han ins pudì perseguitar sin rtr.ch, al Radio Rumantsch e sin Facebook, tranter auter era cun ina charta virtuala, nua ch'ins ha pudì guardar nua exact che Gian-Marco sa chatta. Venderdi suentermezdi vers las 16:00 arriva il viandard a Surrein, nua ch'el vegn beneventà



Gian-Marco Maissen ha dumagnà il viadi da tschintg dis e 140 kilometers da Puntraschigna fin a Surrein.

d'ina gruppa d'audituras e d'auditurs. Retrospectivamain ha il giuven bunamain patì il pli fitg ils emprims dus dis, cunzunt perquai ch'el n'era betg disà da chaminar uschè ditg durant in di. Ma mintga di saja alura i pli tgunsch dad ir a pe. La

motivaziun saja stada gronda, cunzunt sin il davos tschancun. Gian-Marco Maissen recumandass a mintgin da viagiar tras l'atgna patria e dad ir sin ils fastizs d'istorgias.

Dossier: rtr.ch

## Etappas:

glindesdi, il 1. d'avust 2016:  
Puntraschigna – Fuorcla Crap Alv – Bravuogn

mardi, il 2 d'avust 2016:  
Bravuogn – Filisur – Stierva

mesemna, il 3 d'avust 2016:  
Stierva – Tusaun – Panaduz

gievgia, il 4 d'avust 2016:  
Panaduz – Valendau – Glion

venderdi, il 5 d'avust 2016:  
Glion – Surrein

# Esser giuven e lavurar en l'archiv – va quai?

Sco giuvna archivaria hai jau da cumbatter cunter clischés. Mo paucs pon propi s'imaginar che quella lavur pudess era interessar ina persuna giuvna.

Per mai èsi interessant da lavurar en in archiv. D'ina vart èn las tematicas pli veglias, ma da l'autra vart lavuran ins cun ina tecnologia moderna. Sche jau fatsch retschertgas en la banca da datas cun il material da video d'archiv, poss jau guardar il cuntegn cun in clic. Far retschertgas e documentar material vegl è per mai fitg fascinant. Jau poss sfugatar en in temp passà, decennis avant che jau sun naschida. Uschia emprend jau adina puspè insatge dapli da



**1000 segns da l'archiv**

l'istorgia dal Grischun. Però, en in archiv na tutga betg mo material vegl. Era tut quai che vegn produci oz chatta la via en nossas bancas da datas. Ina da mias lavurs las pli impurtantas è da decider tge che ha ina valur archivara. Ins sto damai far patratgs tge ch'ins pudess duvrar en il futur, decider tge ch'en maletgs e tuns istorics, tge che pudess interessar las generaziuns suenter nus. Quel aspect da la lavur da l'archivaria e da l'archivar vegn savens emblidà. Uschia sco che jau guard oz il material da pli baud, vuless jau era ch'ins po guardar en 100 onns tge che nus faschain oz, tge che era actual da noss temp.

Flurina Huonder,  
documentalista RTR

# Raquints ord la claustra benedictina a Mustér

Dominik Hardegger, redactur Battaporta, ha resumà l'emna ch'el ha passentà la fin da matg en la claustra da Mustér en furma d'in comic. Tut las impressiuns èn da chattar sin battaporta.rtr.ch.



# Cafés Rumantschs cun la directura da RTR

Tge vegn apprezià da l'offerta da RTR? Tge fa plaschair? Tge va sin la gnerva? A partir dal november 2016 organisescha RTR ensemens cun la Lia Rumantscha (LR) la seria «Café Rumantsch cun la directura». Cun questa chaschun dat la directura da RTR Ladina Heimgartner pled e fatg a las visitadoras ed als visitaders.

(dj) Empreender d'enconuscher tar petta e café l'interpresa da medias RTR e tschenttar dumondas a la directura: a partir dals 23 da november organisescha RTR ensemens cun la LR ils «Cafés Rumantschs cun la

che manca en l'offerta da RTR, tge che fa plaschair e tge main: «Ils collegas da SRF han lantschà cun success il format da radio e televisiun 'Hallo SRF'. Era nus tschertgain il barat cun il public – ma nus faschain quai sin nossa moda e maniera rumantscha: en las regiuns en empernaivla cumpagnia cun noss public. Quasi al tavulin, ma cun café enstagl da biera», di Ladina Heimgartner.

## Ils termins 2016

ils 23 da november a las 10:00, Scuol  
ils 7 da decembre a las 16:00, Casti

directura». Tant il 2016 sco er il 2017 han lieu en las regiuns mintgamai duas da questas sentupadas cun la directura da RTR. Ladina Heimgartner vul vegnir a savair dals giasts tge ch'els pensan da RTR, tge emissiuns che plaschan spezialmain e tgeninas pli pauc, tge

## Temas plain tensiun e tgira da lingua

Ils giasts han natrالmain era la pussaivladad da vegnir a savair fatgs da la chasa da medias rumantscha RTR, p.ex. co che RTR tgira e promova la lingua e cultura en il Grischun, quant impurtanta



Ladina Heimgartner sa legra da s'inscuntrar cun Vus al Café Rumantsch.

che la qualitad dal program è per RTR e tge plans che RTR ha per il futur. Cun quella chaschun n'intervegnan visitadoras e visitaders betg mo ina massa davart RTR, mabain tgiran er il rumantsch. «Il Café Rumantsch vegn apprezià tant dals giasts sco era dals indigens. Gronda accoglentscha chatta cunzunt er il curt referat a l'entschatta da mintga Café Rumantsch. I dat du-

mondas e discussiuns, impuls e propostas, i vegnan sviluppadas ideas ed opiniuns, insumma: il barat tranter ils participants è adina viv ed interessant», di Carmen Dedual, manadra Regiuns tar la LR. Cun ils Cafés Rumantschs porscha la LR gia dapi pli ditg l'occasiun da discurrer ensemens rumantsch e da discutir davart ils pli differents temas.

# Radio digital: midada da DAB sin DAB+

Ils 15 da november 2016 a las 14:15 datti ina midada tar il radio digital DAB en l'entira Svizra. A partir da lura vegnan ils programs sulettamain derasads cun DAB+. Il DAB (senza il segn +) vegn abolì.

(cg) Avant il termin da midada (ils 15 da november 2016) èsi necessari da controllar che Voss radio saja già pront per DAB+. Faschai ina tschertga da programs. Sche Vus n'udis nagut tar programs cun in plus a la fin, sco p.ex. RR-SRG+, lura na sustegna Voss radio probabla main betg DAB+. Per in scleriment detaglià As adressai a Voss commerzi spezialisà.

Suenter il termin da midada è ina nova tschertga da programs per tut ils radios digitals necessaria. Mo uschia pudais Vus tadlar ils programs (veglis e novs).

Quels che taidlan radio via cabel, satellit u rait (internet) na ston far nagut. Era tar il radio analog via l'aria (UUC/UKW) na sa mida nagut, dentant na pon quels era betg profitar dals avantatgs dal radio digital.

## Partge quella midada?

Cun quella midada pon vegnir recepids dapli programs via l'aria e quai schizunt cun meglia qualitad dal tun. Uschia pon ins era tadlar en il Grischun supplementarmain SRF 1 GR+, Option Musique, RSI Rete Due e RSI Rete Tre.

Il DAB+ porscha natrالmain vina-

vant tut ils avantatgs dal radio digital en cumparegliazun cun il radio analog (UUC/UKW). Quai èn in diever simpel (tschertga automatica dals programs), ina recepziun senza disturbis, infurmaziuns supplementares, ina gronda e vasta purschida da programs e natrالmain tadlar Radio Rumantsch en l'entira Svizra.

## Infirmaziuns supplementaras en la rait

En general davart ils programs da RTR: [rtr.ch/servetschs/recepziun](http://rtr.ch/servetschs/recepziun)  
Midada DAB sin DAB+: [dabplus.ch](http://dabplus.ch)  
Radio digital (DAB+) general: [digitalradio.ch](http://digitalradio.ch)  
Retschaviment programs SRG SSR: [broadcast.ch](http://broadcast.ch)



Eugen Caduff, victur dal jackpot dal Kikeri6 cun Alice Bertogg, moderatura RTR.

## Il jackpot va a Trimmis

(rtr) Suenter passa in mez onn èsi reüssi la damaun dals 27 da fandur da svidar il jackpot dal Kikeri6. En la quarta ed ultima runda dal gieu dal Radio Rumantsch ha Eugen Caduff da Trimmis respundi correc-

tamain 11 da las 14 pretensiuns ed uschia gudagnà 420 bons dal Volg en la valur totala da CHF 4'200.

# Suvlaki, gyros e capretta

RTR ha rinforzà ses engaschi per il barat cultural en il Grischun. Da glindesdi fin venderdi, mintgamai a las 10:15, emprenda il public da radio d'enconuscher meglier la cuschina da immigrantas e immigrants en il Grischun, survegn tips e trics tar temas or dal mund digital u per il diever quotidian dal rumantsch.

### Glindesdi – «Il DigiTip»

Ozendi essan nus circumdads, gea vegnin schizunt inundads da chaussas digitalas. Igl è grev da tegnair la survista. Perquai preschenta la rubrica «DigiTip» mintga glindesdi products or dal mund digital – sco applicaziuns nizzaivlas e trics cun software – e declera terms en quel connex.

### Mardi – «Linguarias»

Gist quest mund digital mida era la lingua. Perquai declera la linguista da RTR Anna-Alice Dazzi mintga mardi en sia rubrica co che la lingua

sa mida, tge ch'è u fiss correct en rumantsch e co ch'i fiss da pronunziar tscherts pleds.

### Mesemna – «La cifra»

Di per di arrivan plunas da cifras tar nus. La cifra da l'emna, p.ex. ina cifra or d'ina statistica grischuna, è il punct da partenza per in'istorgia. En questa rubrica vegnan las audituras ed ils auditurs a savair fatgs pauc enconuschents.

### Gievgia – «Suvlaki, gyros e capretta»

Las pussavladads da giudair

tratgas da pajais esters en noss chantun èn pulitamain grondas. Ins po ir tar il Grec, ins po mangiar tailandais, ed era la cuschina tirca e chinaisa chatt'ins tar nus. Però tge mangian immigrantas ed immigrants a chasa? Nus preschentain mintga gievgia in'autra tratga ch'ins po cuschinlar sez.

### Venderdi – «Il cumpliment»

Cumpliments fan bain al cor! Quai pon esser cumpliments per insatgi che ha fatg il curtin per sia vischina, per insatgi che fa in transport u per la tatta che fa ils megliers capuns. Audituras ed auditurs pon annunziar lur cumpliment. Gievgia decida la moderaziun tgenin che vegn resguardà. Cun la persuna che fa il cumpliment vegn registrà in curt discurs, e venderdi vegn telefonà a la persuna che ha survegnì il cumpliment.

# TIPS, TRICS E TACS

## GIEVGIA, A LAS 10:15

## SUVLAKI, GYROS E CAPRETTA

La cuschina dals immigrants en il Grischun

RTR Radiotelevisiun Svizra Rumantscha

SRG SSR

al puls dal Grischun

# La premiera als gieus olimpics

Sco fan da sport hai jau guardà a la televisiun gia bleras uras las differentas concurrenzas da gieus olimpics. Ma d'esser uss ina giada directamain al lieu e persequitar, gliez è stà ina premiera per mai.

Dad esser l'emprima giada al lieu e sentir il spiert olimpic, sin quai hai jau ma legrà. Ed en spezial perquai ch'ils gieus olimpics da stad han gi lieu quest onn dals 5 fin ils 21 d'a-vust a Rio. In lieu enconuschent, ma ch'è lunsch davent e che jau n'avess uschiglio tgunsch mai visità.

## Lungs viadis e blers kilometers a pe

Sco bleras autras schurnalistas e blers auters schurnalists essan nus stads staziunads en in appartament a Barra, a l'ur da Rio de Janeiro. En il medem lieu sco il parc olimpic cun ils stadiuns da ballachanaster, da dar spada, da nudar, da tennis, euv. Per vegnir tar il parc ed il center da medias èsi il meglier dad ir a pe. Var mes'ura vai, fin ch'ins è là ed ha passà las controllas. Magari era pli ditg. Er entaifer il parc olimpic gigantic èn las distanzas lungas. Per ir dad in lieu a l'auter perd'ins adina bler temp. 20 minutás qua, mes'ura là. E sch'ina concurrence ha gi lieu a la

Copacabana u datiers dal center da Rio, p.ex. quellas da velo u da remblar, lura ston ins quintar en tut cun in viadi dad in'ura e mesa. Bler temp èn ins en il bus u en il taxi u vid ir a pe. Ma tuttina, uschè blers sports en in lieu entaifer duas emnas, quai na datti uschiglio nagliur. Uschè blers sportists da renum en in lieu: Usain Bolt, Michael Phelps, Novak Djokovic, Kevin Durant, per numnar mo in pèr dad els. A gieus olimpics è tut in zic auter. Ils atlets paran d'esser pli datiers als fans che uschiglio. Ed er intgins stars mundials che resideschan uschiglio adina en hotels da tschintg stailas èn sa chasads per in temp en il vitg olimpic.

## Rio, ina citad cun duas fatschas

Impressiunanta è era la citad da Rio. Entaifer curt temp passan ins davent d'in mund en l'auter e puspè enavos. En viadi cun il bus da Barra fin a la Copacabana u en il stadion Maracanã passain nus da quartiers



Roger Alig ed Ursin Lechmann, ils reporters da sport RTR a Rio.

serrads cun bellas chasas e parcs en paucas minutás tras favelas cun suttetgs per part fitg simpels e primitivs. Ils dus munds èn uschè datiers in da l'auter, uschia era la famusa Copacabana, la zona turistica e las favelas sin las spundas da Rio. Era sch'ins va sin la via da la Copacabana sper la mar en direcziun da Barra, ves'ins in maletg fitg spezial, schizunt in pau irritant. Sper la via e la mar sa chatta in bajetg modern d'ina chadaina da hotels internazionala, in hotel impressiunant. E gist davos, sin la spunda, vesan ins las favelas. Rio, ina citad fascinan-

ta, dentant er irritanta, che sveglia adina puspè patratgs. Patratgs sur da ritg e pauper, ma era sur da l'aua tschufragnada e la criminalitat. Durant ils gieus olimpics, è la citad sa preschentada tgunsch in zic auter che uschiglio. Durant questas emnas avevi bunamain en mintga chantun, sin mintga via u schuldads u polacists. I fiss interessant da visitar in'ulteriura giada Rio. Per vesair co che la citad è senza ils gieus olimpics. E cun avair avunda temp per perscrutar ella per propi.

Ursin Lechmann,  
reporter Radio Rumantsch

# La cuppina da RTR en in nov vestgi

Gia dapi blers onns regala il Radio Rumantsch mintga di ina cuppina ad ina giubilara u ad in giubilar. Questa stad è cumparì il 7avel model da la seria.

(mm) As regurdais Vus anc da l'emprima cuppina dal Radio Rumantsch, u avais Vus schizunt anc ina da las cuppinas blaues cun l'inscripziun da las diversas emissiuns da RTR? U la cuppina cun il slogan «Tgi che sa Rumantsch sa dapli»?

Forsa avais gi la fortuna da survegnir la cuppina exclusiva per il giubileum «30 onns gratulaziuns al Radio Rumantsch»? Durant ils davos onns ha il Radio Rumantsch pudì regalar bleras cuppinas e nossia seria dumbaussa già set differents models. La nova cuppina dat spert en egl. Ella è cotschna e porta il slogan actual «al puls dal Grischun». Nus giavischain a tut las giubilaras ed a tut ils giubilars bler plaschair cun la nova cuppina. Dapli davart las gratulaziuns u la cuppina chattais Vus sin rtr.ch.



Ils 7 differents models da la cuppina dal Radio Rumantsch.

# Vita capita en in livestream

Suenter la gronda acziun da Battaporta a l'Open Air Lumnezia èsi stà uras che la normalitat returnia en nossa redacziun. Ma normal n'era tuttina betg tut.

Nus avain empruvà ina nova tecnica durant l'open air. Emetter live sin Facebook cun telefonin. Ed ussa vali da duvrar quest nov med da rapportar en il mintgadi.

Uschia èsi vegnì gist dretg che nus avain pudi rapportar sonda, ils 6 d'avust, d'in viadi cun tren da Mustér a Samedan, cun destinaziun Chapel-la Open Air, che la Giuventetgna Ru-

mantscha (GiuRu) ha organisà per festivar ses giubileum da 25 onns. Quella sonda a bun'ura avain mia collega Daniela Derungs ed jau be pacchetà in microfon e noss telefonins. Quai è già tut quai che nus avain duvrà. Fa ina tecnica pli simpla era pli simpel il rapportar? Denkste! Igl è stà ina gronda sfida da planisar trais livestreams ordavant. L'idea n'era

numnadama betg da be smatgar il buttun «live» e simplamain far x insatge. Igl è impurtant dad avair in concept. Per mintga livestream avain nus duvrà in focus, i stueva esser cler tgi ch'è partenadi d'intervista e davart tge tema ch'i vegen discurri.

## Armads cun telefonin e microfon

Per mai e Daniela èsi stà l'emprima giada che nus avain rapportà live sin Facebook. Cura ch'il tren è arrivà a la staziun da Mustér essan nus ids ense-

men cun la GiuRu a la tschertga da lur vagun reservà – però adumbatten. Il vagun era numnadama reservà en il tren che fiss vegnì in'ura pli tard. Nus avevan già cumenzà il livestream, uschia para la situaziun forsa in zic caotica. Ma la vita capita, tut na pon ins betg planisar. Mintgatant èsi malgrà concept d'esser spontan e d'improvisar. Noss emprims livestreams èn stads per nus dus ina fitg buna experientscha ed in bun exercizi per emprender co ir enturn cun situaziuns imprevisiblas. En general essan nus cunents cun il resultat. Cler ch'ins vesa suenter l'acziun adina ina u l'altra chaussa ch'ins avess pudi far meglier. Jau ma legrel en mintga cas già ussa da far diever da mias experientschas e da l'emprendi a chaschun dals proxims livestreams.

Livio Chistell  
redacteur Battaporta

Videos e fotografias dal viadi cun tren pon ins guardar sin [battaporta.rtr.ch](http://battaporta.rtr.ch).



Livio Chistell e Daniela Derungs.



Leander Albin prelegia ina da sias ditgas.

## Enconuschais Vus Tumasch u avais Vus già vis el insanua?


(rtr) Tumasch è quest onn preschent a differentas occurrentzas. Vus enconuschais el vi da ses t-shirt alv cun ses num. Sche Vus

entupais el, fa el cun Vus in selfie. Quel vegn alura publitgà sin Facebook. Ils selfies cun ils pli blers «plascha a mai» pon gudagnar premis che ststattan en connex cun la proxima occurrentza, a la quala Tumasch è preschent.

Tut las fotografias ch'en vegnidà fatgas durant l'Open Air Lumnezia (dals 21 fin ils 23 da fanadur 2016) ed a la festa da Cuira (dals 19 fin ils 21 d'avust 2016) chattais Vus sin la pagina da Facebook da RTR [facebook.com/rtr.ch](http://facebook.com/rtr.ch).

**Tumasch è preschent a las suandardas occurrentzas:**

**28 d'october 2016:**  
Tschintg onns City West, Cuira  
**12 da november 2016:**  
Sonda lunga, Cuira



Noss «Tumaschs» a l'Open Air Lumnezia 2016.

Daventa amia da RTR sin **facebook**

# Tgi è stà a l'Open Air Lumnezia 2016?

Era Selina Huonder, emprendista RTR, è stada – vestgida sco «Tumasch» – a la chatscha da selfies durant l'Open Air Lumenzia. Sper il fotografar è ella era veginida en discurs cun las visitadoras ed ils visitaders.



**Benjamin Schmid ed Armin Jägli**

Ils dus giuvens han chattà la sonda endamaun, suenter il servetsch militar, la via dad Ursera a Degen. Benjamin da l'Appenzell Dadora è stà per la seconda giada ed Armin da Fideris per l'emprima

giada a l'open air. Malempernaivel è stà per els la buglia e ch'i n'ha betg dà bleras pussaivladads da seser. Persuenter han els pudì sa recrear da la scola da recrut en la lounge da RTR.



**Giulia Cathomen, Valeria Hendry e Fiona Cavegn**

Giulia Cathomen (17) è stada per la seconda giada a Degen. La giuvna da Breil va gugent a l'Open Air Lumnezia per passen-tar intgins bels dis cun sias colle-gas. Ella n'ha dentant betg gi plas-chair da stuair nettegiar ses chalzers, cura ch'ella è puspè ida a chasa.

Era Valeria Hendry (17) da Mu-stér è stada per la seconda giada a l'open air. La musica da la grup-pa tudestga Scooter n'ha betg tutgà ses gust. Tge che Valeria ha dentant laschè gustar eran las bunas spaisas ch'igl ha dà sin ils differents stans.

Fiona Cavegn (18) da Breil è già stada la terza giada al Lumnezia. Tge che plascha fitg bain ad ella è che l'open air è pitschen e fami-gliar. Ins vespa adina puspè glieud ch'ins enconuscha e po dar ina baterlada, giudair ils concerts en-ensem u simplamain restar tar las tendas ed avair discussiuns interessantas. Fiona è in fan da moda ed ha perquai gi fadia cun tscherts outfit ch'ins ha vesì a Degen; la cumbinazion da chautschas quadrigliadas cun in lismer sdrimà na va tenor ella p.ex. insumma betg.



**Olivia Virgolin**

La giuvna Partenzra da 16 onns ha chattà la via da Grüschen en la bella Val Lumnezia. Ella è stada per l'emprima giada a l'open air ed ad ella ha plaschì il meglier la glieud contenta. Tge ch'ella ha chattà in pau donn è l'aura. Sch'ins passenta il temp cun la dretga glieud è lezza dentant secundara.



**Claude Bachmann**

Il giuven da 31 onns, oriund dal chantun da Lucerna, abitescha dapi intgins onns a Cuira, nua ch'el stu-degia teologia. El è stà per l'emprima giada a l'Open Air Lumnezia. Il dialect tudestg da la Svizra Orienta-la ch'el ha udi sin l'areal n'ha el betg uschè gugent. Perconter ha el chat-tà bel ch'igl è era veginì discurri rumantsch. Ed era plaschì ad el ha il fatg che persunas che n'han anc mai vis l'ina l'autra vegnan bain perina. Er il lieu geografic da la val da la gisch plascha ad el, surtut la bella vista sin ils culms.

**Matias Jacomet**

Per la terza giada è il giuven da 19 onns da Sedrun stà a l'Open Air Lumnezia. Tge ch'è adina puspè da nov bel per el è dad esser en in lieu, nua che tutt han buna luna. Ins po scappar per intgins dis dal mintga-di, esser ensem cun collegas e simplamain avair in bun temp. Per star da cumpagnia fissi stà anc pli empernaivel, sch'i fiss stà sitg e chaud.



# «Vegetari» – in vegl pled per «schlet chatschader»

(al) Ok, il titel na constat probabel betg. Ma en mintga cas è il settember en il Grischun il mais da las chatschadras e dals chatschaders. Recepts per charn da selvaschina datti ina massada. Però – tge cuschinars, sch'ins n'ha (anc) gi nagin success cun la buis? Las cuschinieras da hobi Tamara Deflorin ed Andrina Luzio han créa in menu alternativ cun ingredienzas stagiunalas per tuttas e tuts che vulessan empruvar insatge nov. Bun appetit!



## Pair cotg en il furn cun chaschiel-chaura, figs e ruca per 2 persunas

|   |  |
|---|--|
| 2 pairs   | mintgamai tagliar en 5 tocs coier en il furn (180°C, ca. 20 minutus) prender or dal furn |
| 1-2 tp confitura da figs e/ubain mel d'avieuls in pugn plain ruca | stritgar sin mintga toc pair   |
| 1-2 figs frestgs* (tagliads en talgias)                           | plunar tut tenor gust l'in sin l'auter   |
| 4 talgias chaschiel-chaura  | per la decoraziun  |
| 4-5 nuschs manizzadas in zic aschieu balsamic (opziunal)          |  |

\*varianta cun charn: 4 talgias bresaola (schambun)

## Cupcakes da pumaraida

ca. 12 tocs

|                          |  |
|--------------------------|--|
| 125 g paintg             | sbatter enfin ch'il paintg è lom e cler  |
| 250 g zutger             | aggiuntar e sbatter  |
| 1/2 tp pasta da vaniglia | truschar en mintgin singul   |
| 3 ovs                    |  |
| 1 tp pulvra da levon     | sbatter enfin ch'ins na vesa nagina farina pli   |
| 250 g farina             | aggiuntar en tschaduns (betg sbatter memia ditg)   |
| 2 dl latg                | aggiuntar e sbatter levet emplenir la pasta en furmettas da palpíri  |
| in pugn plain pumaraida  | important: duvrar ina furma da pastizaria per muffins coier en il furn (180°C) ca. 20 minutus laschar sfradendar 10 minutus e prender or da la furma |

## Crema

|  |   |
|--|---|
| 100 g paintg (lom)                           | sbatter cremus  |
| 100 g chaschiel frestg (p. ex. Philadelphia) | aggiuntar plaun a plaun e sbatter vinavant  |
| 250 g zutger en pulvra                       | aggiuntar cun in tschadun e sbatter tut sin la pli auta sveltezza (mixer) emplenir la crema en in satg da garnir decorar ils cupcakes cun crema e pumaraida |

## Burgers da rischcotschnas cun «pomfrits» da zitga per 2 persunas

### Patties da rischcotschnas

|                  |                          |
|------------------|--------------------------|
| 1 rischcotschna  | 1 ov                     |
| 1 rischmelna     | in schluc latg           |
| 1 frischla d'agl | sal, paiver e spezarrias |
| 1 tschagula      | 1 tp mandels mieuts      |
|                  |                          |

far giu la paletscha grattar cun la maschina da cuschina

aggiuntar e truschar enfin che tut è bain maschdà e suenter furmar cun ils mauns dus patties la pasta duess tegnair ensemens uschiglio agiuntar dapli latg brassar ils patties en ina padella da mintga vart ca. 4-5 minutus

### Sosa (per burger e «pomfrits»)

|                      |                                 |
|----------------------|---------------------------------|
| 1 avocado            | splattitschar cun ina furtgetta |
| 1 tp suc da citronas | maschadar                       |

### Bun da tartuffel

|                       |  |
|-----------------------|--|
| 500 g tartuffels      | far giu la paletscha, lavar e raspar fin derscher ora l'aua che sa rimna                     |
| 1/2 tschagula         |  |
| 1 tg farina           | maschadar cun ils tartuffels cundir  |
| 1 presa sal/spezarias | brassar purziuns en la grondezza dals patties enfin ch'ils buns da tartuffels èn brin aurads |
| paintg                |  |

metter ensemens ils burgers cun verdura e tenor gust

### «Pomfrits» da zitga\*

|               |  |
|---------------|--|
| ca. 1/2 zitga | tagliar en strivlas (resp. en la furma da «pomfrits») marinat cun ieli d'ulivas, sal e paiver coier en il furn (200°C) enfin ch'ils «pomfrits» èn in pau brins |
|---------------|--|

\*i funcziuna era cun rischmelnas e patats

## Decleraziuns tar ils recepts

tp  
tg

= tschadun pitschen  
= tschadun grond

patty/patties  
bun

= cocca da charn ubain vegetara che vegn en il burger  
= viertgel e palantschieu dal burger

# Minisguard: Dovri propi quels temas brutals?

Las attatgas da terrur dals davos mais ed ils rapports en las medias dattan a blers il sentiment ch'i saja mo pli malsegir en l'Europa. Cunzunt per uffants èsi fitg grev da chapir, da relativar e da pudair sa distanziar da talas tematicas da violenza.

Declarer violenza ad uffants è in grev pensum. Cunzunt per geniturs, dentant er adina puspè per nus, la redacziun dal Minisguard. Tutgan quellas tematicas en la «Tages-schau», cura ch'ils uffants dorman? Duessan ils uffants insumma vegnir infurmads? Quant dastg'ins mussar



Toc explicativ dal Minisguard che declarà co che glieud giuvna sa lascha sa radicalisar.

## Il radio 2.0

Pli baud spargnav'ins ses daner da giagliooffa per la nova platta. Studegiava intensivamain la cuverta, tadlava si e giutut las chanzuns e discutava davart ellas cun ses amis.

Oz vegn la gronda part da las chanzuns chargiada giu da l'internet u tadlada sur in servetsch da streaming. I para ozendi pli impurtant d'avair ina gronda elecziun che da sa profundar en la musica e da s'ocupar cun ella. Tge ch'è restà: pli baud sco er oz taidl'ins blera differenta musica. Da rock e pop fin hip-hop e dubstep, musica classica ed anc bler auter. La differenza è ozen-di la disponibladad. Quasi dapertut e da tuttas uras pon ins chargiar giu e tadlar musica. Il temp, cura ch'ins stueva spetgar davant il radio per prender si las novas chanzuns sin cassetta è passà. Vegg il radio cun

quai obsolet? Na, per il radio signifga quai «simplamain» ultra da porscher in program vast e divergent era da nizzegiar las novas tecnologias e cunzunt da sa concentrar sin las competenzas-clav dal radio: emissiuns exclusivas, cuntegn surlavurà, intervistas e – la pli gronda fermezza dal radio – concerts live. Pachetar las qualitads veglias en in vestgì modern ed esser unic è la gronda sfida dal radio.  
Jau sun spanegià e ma legrel da far part da quest svilup!

Gion Dominic Pohle,  
redactur da musica

e co stuess ins rapportar? L'empri-ma dumonda è fitg simpla da respunder: betg tematisar na gida na-gut. Era sch'ins na vul betg, baud u tard audan e vesan er ils uffants ils tuns e purtrets.

Bler pli complex da responder è il «quant e co». En in'emissiun per uffants na tutgan en mintga cas na-gins purtrets da violenza e da despe-razjuni e nagins purtrets che laschan memia bler spazi per interpreta-zjuni. Ils uffants duain chapir e betg avair tema. E perquai na rapportain nus per il solit era betg en detagl dal schabegià, mabain declarain il per-tege. Suenter las attatgas da Paris p.ex. avain nus declarà co che glieud giuvna sa lascha sa radicalisar e betg mussà purtrets da morts e rap-

portà da cifras. Impurtant è da tschentar a l'entschatta mo ina dumonda e da responder quella a moda cumplessiva. Era sche nus stuain mintgatant reducir e simplifitgar ils temas, fin che nus essan al cunfin da la correctadad.

Però er impurtant èsi da relaschar ils uffants ord talas contribuziuns adina cun ina schliaziun. Sulettamain uschia èsi per els pussaivel da magunar temas brutals. Ed era per-quai terminain nus il MSG adina cun in'istorgia positiva che duai mussar ch'il mund r'nè propi betg uschè nausch sco quai che outras novitads pon far l'impressiun.

Mirco Manetsch,  
producent MSG e Battaporta

## Davos las culissas dal Minisguard

Era questa stad han uffants da diffe-rentas regiuns grischunas visità RTR cun il «Pass da vacanzas» da la Pro Juventute. Per mai èsi stà l'em-prima giada che jau hai dastgà mussar als giasts giuvens nossa chasa da medias, ed en spezial nossa pur-schida per uffants. Las mattas ed ils mats èn mintgamai stads durant l'entir guid plain mirveglias, han fatg ina massa dumondas ed avevan srtut grond tschaffen d'empruvar ils trics en il studio da televisiun vir-

tual. Per mai èn quests guids stads ina bellezza experientscha. Surtut d'avair il public, ch'è uschiglio da l'autra vart da la camera, uschè da-manaivel e d'udir lur resuns persunals hai jau apprezià zunt fitg.

Elin Batista,  
moderatura e redactura MSG

Avais era Vus gust da visitar la cha-sa da medias da RTR? As annunziai cun il formular sin rtr.ch (rubrica servetschs/visitas).



Las mattas ed ils mats che han fatg diever dal «Pass da vacanzas Alva e Surses» en il studio da televisiun virtual da RTR.

# Mr. helpdesk junior

Essas Vus gia As dumandads tge ch'in informaticher fa insumma? Fabio Pally da Curaglia, emprendist d'informatica RTR en il terz onn, raquinta da ses mintgadi.

Mintgamai l'entschatta da l'emna visit jau durant dus dis la scola professionala artisanala a Cuira. Il glindesdi vegn instrui tuttadi informatica. La classa (mo giuvens, nus n'avain betg ina suletta giuvna) è partida si en duas gruppas: informatichers cun direcziun «tecnica da sistem» ed informatichers da manaschi. Plinavant dessi anc l'informaticher d'applicaziuns, quels emprendan da programmar differents programs en differentas linguis da programmar. Els van però a scola a Turitg. Il glindesdi emprend jau sco emprendist d'infor-

divers champs, però betg a moda uschè approfondada sco informatichers cun direcziun «tecnica da sistem» ed informatichers d'applicaziuns sin lur champs. Il segund di da scola han tut ils informatichers cuminaivlamain roms ordinaris sco matematica, fisica, englais ed economia.

## En fatschenta

La mesemna entschaiva la laver en fatschenta cun «helpdesk». Durant quest servetsch stun jau a disposiziun per gidar collavuraturas e collavuraturas en cas da problems tecnicis. Quai pon esser problems fitg différents, d'in squitschader che na funcziuna betg fin in entir sistem ch'è crudà ora. Il servetsch «helpdesk» è occupà 7 dis l'emna e quai durant 24 uras a di. La persuna che ha servetsch è però «mo» preschenta en chasa RTR durant las uras da biro. Sch'igl avess da capitar insatge durant la notg, sto la persuna che ha pichet esser en biro entaifer in'ura. Tenor reglament naziunal na poss e stoss jau sco emprendist dentant betg far il servetsch durant la notg. La gievgia hai jau servetsch ordinari. Las lavurs varieschan, tut tenor actualitat: p. ex. installar novs laptops, surveglier servers u schliar problems tecnicis. Il venderdi hai jau anc ina giada servetsch «helpdesk», damai era quel di sun jau cuntaschibel e gid collavuraturas e collavuraturas en cas da problems tecnicis.

A l'entschatta da l'emprendissadi fascheva jau en fatschenta lavurs pli simplas sco midar toners da squitschaders ubain installar PCs. Ussa dentant fatsch jau gia dal tut.

## Fatgs tar l'emprendissadi d'informatica

In emprendissadi sco informaticher cun direcziun «tecnica da sistem» dura quatter onns. Durant ils emprims traïs onns han ins dus dis l'emna scola, il davos onn mo pli in di l'emna, dentant han ins alura naturalmain anc l'examen final d'emprendissadi. Sper la scola èsi era da visitar set differents curs intermanaschials, en total 35 dis durant ils emprims dus onns.

matica cun direcziun «tecnica da sistem» p.ex. d'installar hard- e software, da configurar apparats e scolar utilisaders. Plinavant emprend jau co realisar ed administrar raits (LAN, WLAN) e d'installar, administrar e surveglier servers (computers che mettan a disposiziun servetschs). L'autra gruppa, ils emprendists d'informatica da manaschi, èn all-rounders. Els fan dal tut ed enconuschan bain



Fabio Pally, emprendist d'informatica RTR.

Davent da crear e configurar novs utilisaders, surveglier servers e configurar la rait. Er il servetsch «helpdesk» è ina laver che jau n'hai betg fatg a partir da l'entschatta. En fatschenta sco era durant il

temp liber laver jau fitg gugent cun infrastructura d'informatica. Jau sun fitg cument d'astgar far mes emprendissadi tar RTR. Il motiv principal è il super team che nus avain qua.

# VOSSA VUSCH EN LA RAIT

www.battaporta.ch

**BATTAPORTA**

RTR

Radiotelevision Svizra Rumantscha



Era els tutgan tar il public en mira da RTR:  
Isabel Cabrin (10) e Marc Cabrin (39).

## Egl en egl cun il public

Tgi èn ils egl s e las ureglas da l'autra vart da la camera e dal microfon? Tgeninas èn lur disas da consumar medias? Tge lur basegns e giavischs?

(eb) Avair las respotas sin questas dumondas e resguardar quests aspects en l'offerta è essenzial per avair success cun il program. Esser là nua ch'il public è, è la finamira e maxima da RTR. Quai pretenda d'avair in cler maletg da ses visavi. Cun questa intenziun ha RTR identifitgà sin basa da retschertgas dals ultims onns e trends actuels il public represchentativ da RTR. Il public da tschep fidà, ma er il public che consumescha occasiunalmain l'offerta da RTR e ch'i vala da plementar en avegnir anc meglier.

En in segund pass ha RTR tschertgà persunas en las differentas regiuns da la Svizra rumantscha che correspundan als profils generals e che dattan a quels ina fatscha reala. Per far elllas ed els anc pli palpabels èn vegnidadas realisadas fotografias sin chartun en il format 1:1. Questas fotografias sin chartun èn actualmain d'inscuntrar en chasa RTR a Cuira en las differentas partiziuns. Las persunas tegnan ina tavla che descriva il profil dal public ch'ellas represchentan. Ellas ed els dattan ina fatscha als egl s ed a las ureglas da l'autra vart da la camera e dal microfon.

## RTR e la musica rumantscha

Tar RTR n'è il rumantsch betg mo impurtant al microfon, avant la camera u online, era tar la musica è nossa lingua in dals acturs principals. Ura per ura resuna musica rumantscha sin las undas dal Radio Rumantsch e pir quai procura per noss program da musica unic che stgaffescha identitat.

Ins po era volver l'aspect e prender che RTR è in dals acturs principals en la scena da la musica rumantscha. RTR sustegna, promova e collia la musica rumantscha nua ch'igl è pussaivel. Nus sustegnain musicistas e musicians da producir lur discs cumpacts, registrain concerts, accumpagnain festas da chant e musica, ans participain a festivals e producin ed organisain er atgnas serias ed occurrenzas musicalas. Il resultat final: bler material per il vast archiv da musica da la SRG SSR (actualmain cumpiglia noss archiv var 15'000 titels rumantschs!) e nundumbraivlas uras regiuns.

d'emissiun: sco p.ex. «Artg musical», «Noss chor», «L'instrumentala» u era «La populara».

Ils ultims onns è RTR era sa sviluppà ad in intermediatur cun buns contacts, il qual vegn apprezià da las musicistas e dals musicians. Uschia han tranter auter Mattiu Defuns, Pascal Gamboni u Bibi Vaplan pudì far il pass en ils programs da musica da Couleur 3, Rete 3 u SRF 3 grazia als buns contacts da RTR cun ils collegas da las outras regiuns.

Flavio Tuor,  
producent musica

| Zeit             | Interpret         | Titel                       | Radio            |
|------------------|-------------------|-----------------------------|------------------|
| 22.08.2016 07:28 | Pascal Gamboni    | Quel Volta Ben Bie          | SRF 3            |
| 19.08.2016 13:32 | Pascal Gamboni    | Quel Volta Ben Bie          | SRF 3            |
| 19.08.2016 11:09 | Pascal Gamboni    | Quel Volta Ben Bie          | Radio Rumantsch  |
| 19.08.2016 06:23 | Pascal Gamboni    | Aur                         | Radio Rumantsch  |
| 18.08.2016 21:14 | Pascal Gamboni    | Der Schlaf Ist Mein Friseur | Radio Rumantsch  |
| 18.08.2016 19:37 | Pascal Gamboni    | Llung Univers               | Radio Südschweiz |
| 18.08.2016 03:55 | Pascal Gamboni    | Paul                        | Couleur 3        |
| 17.08.2016 22:51 | Pascal Gamboni    | Quel Volta Ben Bie          | Radio Rumantsch  |
| 17.08.2016 13:54 | Pascal Gamboni    | Paul                        | Couleur 3        |
| 17.08.2016 10:12 | Pascal Gamboni    | La brata co                 | Radio Rumantsch  |
| 17.08.2016 02:40 | Pascal Gamboni    | Quel Volta Ben Bie          | SRF 3            |
| 15.08.2016 17:45 | Pascal Gamboni    | Cadrega                     | Radio Rumantsch  |
| 14.08.2016 22:46 | Pascal Gamboni    | Unics 09                    | Radio Rumantsch  |
| 14.08.2016 11:31 | Pascal Gamboni    | Paul                        | Radio Rumantsch  |
| 14.08.2016 10:40 | Pascal Gamboni    | Quel Volta Ben Bie          | SRF 3            |
| 13.08.2016 13:13 | Pascal Gamboni    | Quel Volta Ben Bie          | SRF 3            |
| 13.08.2016 07:50 | Pascal Gamboni    | Quel Volta Ben Bie          | Radio Rumantsch  |
| 12.08.2016 04:53 | Pascal Gamboni    | Quel Volta Ben Bie          | SRF 3            |
| 11.08.2016 06:39 | Pascal Gamboni    | Paul                        | Radio Rumantsch  |
| 10.08.2016 01:40 | Pascal Gamboni    | Quel Volta Ben Bie          | SRF 3            |
| 09.08.2016 17:35 | Pascal Gamboni    | Der Schlaf Ist Mein Friseur | Radio Rumantsch  |
| 07.08.2016 04:14 | Pascal Gamboni    | Quel Volta Ben Bie          | SRF 3            |
| 02.08.2016 03:52 | Pascal Gamboni    | Quel Volta Ben Bie          | SRF 3            |
| 01.08.2016 02:20 | Pascal Gamboni Ch | Cadrega                     | Rete Tre         |

Ils tocs da musica da Pascal Gamboni sin in extract da la glista dad airplay svizra dals 1. enfin ils 22 d'avust 2016.

# La Chadaina da Fortuna – co che tut ha cumenzà avant 70 onns

«Y'a du bonheur pour tout le monde» – la fortuna è qua per tuts! Cun ina chanzun, in'idea ristgada e bler engaschament ha l'istorgia da la Chadaina da Fortuna cumenzà il 1946.

Ils dus moderaturs da radio ed entertainers Jack Roland e Roger Nordmann sa sentivan mal en vista a la povrداد ed il basegn suenter la Segunda Guerra mundiala e vulevan far insatge cunter quai. Cura ch'els han retschet ina brev da chadaina han els gi l'idea: uschia insatge fissi da far, simplamain sco emissiun da radio. L'idea era ristgada e da persvader ils chefs tut auer che simpel. Ils 26 da settember 1946 ha Radio Sottens, oz RTS, emess l'emprim appell per pussibilitar ad orfens da l'Engalterra vacanzas en Svizra.



Rita Uffer.

## La Gavotte

Tgi che adempliva spezialmain bain l'appel per agid, pudeva proponer la proxima bun'ovra. Uschia è daventà or d'in appel per donaziuns in'atgna emissiun da radio emnila: la «Chaîne du Bonheur», la «Chadaina da Fortuna». La finamira era da betg interrumpere la chadaina. La caracteristica principala da l'emissiun da radio era la chanzun «Gavotte» cun il refrain: Y'a du bonheur pour tout le monde – la fortuna è qua per tuts. Quella giada enconuscheva mintgin en Svizra franzosa questa chanzun ed ils dus inventaders eran stars re-



Maria Cadruvi.



Ils inventaders da la Chadaina da Fortuna Jack Rollan e Roger Nordmann amez donaziuns en il magasin da Radio Sottens.

(Foto: Chadaina da Fortuna)

giunals che gievan sin turnea tras ils vitgs. Curt suenter han las stazioni da radio da la Svizra tudestga e taliana, pli tard era da la Svizra rumantscha, surpiglià l'idea. Uschia è la Chadaina da Fortuna daventada in'acziun da l'entira Svizra. Oz – 70 onns pli tard – ha la Chadaina da Fortuna appellà passa 190 giadas da far donaziuns.

## Da liongias e cigaras a projects umanitars

Il 1946, curt suenter la Segunda Guerra mundiala, han era blers umans en Svizra patì da la povrداد: uffants da tschintg onns che n'avevan anc mai gi in pèr chalzers u mammas cun tschintg uffants che stuevan nutritir l'entira famiglia cun 317 francs il mais. Il cumenzament vegniva cunzunt rimnà chaussas. Il studio da radio a Losanna era bainbaud fullanà cun chistas plain cigaras, liongias, matratschas, chalzers, giugarets e bler auter. In radio n'è dentant nagin'ovra d'agid ed uschia ha Radio Sottens cumenzà a collavurar cun la Crusch Cotschna Svizra che repartiva las donaziuns. Oz ha la Chadaina da Fortuna 25 ovras d'agid partenarias. Ella ha rimnà en tut 1,7 milliardas francs donaziuns. L'emissiun da radio è daventada il pli grond donatur privat svizzer per agid umanitar ed il bratsch umanitar da la SRG SSR.



Claudia Cathomen durant in'acziun da la Chadaina da Fortuna en chasa RTR.

## La Chadaina da Fortuna – cifras e fatgs:

|                           |  |
|---------------------------|--|
| Sedia:                    | Genevra  |
| Dumber da collavuraturAs: | 20 / 15,2 plazzas<br>(18 Genevra, 1 Turitg, 1 Lugano)                                  |
| Ovras d'agid partenarias: | 25   |
| Directur:                 | Tony Burgener  |
| Presidenta:               | Ladina Heimgartner   |
| Coordinaturas RTR:        | Claudia Cathomen (dapi il 2005)<br>Rita Uffer (1999-2005)<br>Maria Cadruvi (1991-1999) |

Il Radio Rumantsch è sa participà l'emprima giada il 1991 ad ina acziun da la Chadaina da Fortuna. Las donaziuns eran lura vegnidias rimadas a favur da la campagna «Aua» per las regiuns dal mund che piteschan da setgira e mancanza d'aua.

Daniela Toupane,  
Chadaina da Fortuna

## Nov president da la SRG SSR

Il cusseglier guovernativ vallesan Jean-Michel Cina daventa nov president da la SRG SSR. El surpiglia l'uffizi il 1. da matg 2017.

(srg ssr) Jean-Michel Cina ha 53 onns, è advocat e notar. El è maridà ed ha dus uffants. Dapi il 2005 mai na Cina il departament da l'economia publica dal chantun Vallais ed actualmain presidiescha el era la Conferenza da las regenzas chantinalas.

Jean-Michel Cina sa legra sin sia nova incumbensa: «Jau sun in representant persvas dal service public. Jau hai lavurà en l'administraziun ed en la politica ed hai ramassà experientschas en l'economia privata cun far part da cussegls administrativs. Igl è in'onur, ma er ina gronda responsabladad d'esser president da la chasa da medias da la SRG SSR.»



Viktor Baumeler, il president partent da la SRG SSR, è persvas che Jean-Michel Cina rinforza il cussegli administrativ grazia a sia gronda experientscha e ch'el po promover il dialog cun la politica.

## Nova preschientscha en l'internet per la SRG.R

Tge fa la SRG SSR Svizra Rumantscha (SRG.R) insumma?

Cun tge tematicas sa fatschenta il cussegl dal public e cura ha lieu la proxima radunanza annuala? Respostas chattais Vus sin la pagina [srgr.ch](http://srgr.ch).

(amr) La pagina [srgr.ch](http://srgr.ch) sa preschenta en ina nova grafica, optima main attractiva e cun dapli fotografias ed illustraziuns che fin ussa. Da chattar èn sa chapescha las infurmaziuns da basa sco p.ex. l'organisaziun da l'uniun ed ils differents gremis cun ils singuls commembres. Sin la nova pagina pon persunas interessadas era s'annunziar directamain per ina commembranza. En la rubrica «Actualitat» èn plazzadas infurmaziuns e novitads

che pertutgan en spezial la SRG.R, RTR ma era l'entira SRG SSR. La rubrica «Prevista» infurmescha davart occurrentzas futuras, actualmain p.ex. davart la proxima dieta naziunala da la SRG SSR che ha lieu ils 30 da settember 2016 a Lugano. Co As plascha la nova pagina? Avais Vus propostas per ulteriuras rubricas, per optimar il cuntegn ubain per megliar la survista? Tramettai Voss resun a [srg.r@rtr.ch](mailto:srg.r@rtr.ch).

## Tschintg dumondas a Carelia Joos (33), pura, Valragn/Hinterrhein

Commembras e commembres da la SRG.R vegnan a pled

### **1. Pertge essas Vus commembra da la SRG.R?**

Jau sun creschida si cun RTR e la SRG.R. Mes bab (Christian Joos) ha lavurà 35 onns per il Radio Rumantsch.

### **2. Tge spetgaus Vus da la SRG.R?**

Mias aspectativas sa drizzan a RTR: In program varià per giuven e vegl, infurmaziuns or da la Rumantschia e per la Rumantschia ed in sustegn per la chapientscha tranter ils idioms.

### **3. Tgeninas èn Vossas emissiuns preferidas da RTR, e pertge gist quellas?**

La Marella ed il Profil – mai interes- san istorias, opiniuns e vistas d'autras persunas. Igl è er adina interes- sant d'udir tge che Rumantschas e Rumantschs fan or en il mund u en autras parts da la Svizra.

### **4. Giavischs, critica e laud per RTR?**

Jau chat bel che RTR è vegni pli giu- ven e pli frestg che en ils dis da mes bab. RTR duess star vidlonder da gi- dar a mantegnair nossa lingua cun in program era per glieud giuvna.



### **5. Tge impurtanza ha per Vus la lingua rumantscha?**

Sco emprim è quai la lingua da famiglia. Cun mes geniturs ed a chasa di- scurrin nus rumantsch. Per mia la- vur en tscherts gremis è il ru- mantsch er in «avraportas» per vegnir en contact cun differentas persunas. Cun mes pitschen figl (4 mais) discur jau rumantsch, era sche nus avain in conturn tudestg a Valragn/Hinterrhein. Jau speresch fitg che mes figl vegnia a discurrer rumantsch.

# DAVENTAI COMMEMBRA DA LA SRG.R

Contribuziun annuala:  
**CHF 20.– per persunas singulas**  
**CHF 30.– per uniuns**  
**CHF 80.– per persunas giuridicas**

# «Nus avain fatg gasetta»

Co fan ins ina gasetta? Sur da tge scrivain nus? Tgi scriva tut quels textos? Tgi fa las fotografias? Co fan ins il layout? Quant temp duvrain nus? Co vegn il resultat a plaschair a las lecturas ed als lecturs? Quellas e bleras autres dumondas han accompagnà las emprendistas ed ils emprendists da RTR durant la realisaziun da questa edizion dals Accents RTR, in'edizion cun il focus sin l'aspect giuven.

Sco preparazion avain nus pudi guardar tar l'edizion dal zercladur sur las spatlás dals «profis», ch'en normalmain responsabels per ils Accents RTR. Igl è stà in grond agid da vesair quest process ordavant. Alura èsi vegni serius per nus: sesidas, rammassar temas, scumparter las incumbensas, far retschertgas, fotografar e natormalmain scriver ils textos. Jau sun fitg cuntenta cun il resultat final, hai gi bler plaschair da collavurar en il team e d'emprender insatge nov. Per mai èsi stà ina fitg bella experientscha. Grazia fitg a tuttas e tuts per la buna ed empernaivla collavuraziun.

Hanna Last,  
emprendista kommerziala e  
schefredactura da questa  
edizion dals Accents RTR



Il team responsabel per questa edizion dals Accents RTR: Orlando Cadonau, Hanna Last, Fabio Pally, Vanessa Erni e Selina Huonder.

Charas Manuela, Elin, Fabia, Daniela ed Oceana,  
chars Livio, Dominik e Curdin

Na, questa cartulina na va betg a vus «mo» perquai che questa edizion dals «Accents» vegn fatga da nossa squadra d'emprendistas e d'emprendists e causa che vus essas la redacziun da e per giuvens da RTR. Tenor mai avais vus pli che merità questa cartulina, suenter che jau hai vis ed udi tut quai che vus avais rapportà da l'Open Air Lumnezia. Vus avais fatg cuntegns divertents e spier-tus sin tut ils chanals ch'en frequentads da noss public. Vus avais era pudi gudagnar nov public, oravant tut giuvens, che han da far uschiglio pauc cun las purschidas da RTR. E sper tut ils cuntegns per ils chanals socials sco Facebook, Instagram u Snapchat avais vus er anc realisà in entir film da «Contrasts» cun bellas istorgias enturn questa gronda festa sut tschiel avert. Per vossa lavour minuziosa e professiunala e voss gust fervent da far insatge propri autentic, divertent e captivant: in cordial «grazia fitg».



RTR  
p.m. dal team #OAL16  
Via da Masans 2  
7000 Cuiria

Ladina

